

Leukah' mun' ren'kawn tem' Maku'

Yo'han cawo' tuil' hk'a' cum'

¹ Leukah' mun' ren'kawn lawng Eun Yesu' Hkrit Kon' ai' Peucawo' na' tang' a ri yeuhki'.

² Nang htawm eun I'saya' ku' meuh peue suip leukah' Eun Peucawo' na' tem' a ri uin' ri yeuhki',
"Kaw Ui' cus' peue caee ri na' eun heul' nanggal' Mi.

Eun kaw bai mhe' hk'a' Mi na'.*

³ Eun klawng ri lah' a nang vang hk'oh'hk'oeng' na' yeuh keutit',
'Mhe' hk'a' pun Peucawo' Eun reu'.

Yeuh hk'a' na' seumeu' pun Eun reu'.'† ”

⁴ Yo'han cawo' tuil' hk'a' cum' puc eun ri nang vang hk'oh'hk'oeng' na'. Punta kaw peue pun hk'a' ploé' map' ri na', eun sangsawn' lawng taws' hpum' fuin map' ri rap ri ti hk'a' cum' na'. ⁵ Peue kuing' Yu'da maeé' peue veng Yerú'salaem na' ce gawm'euc' ce ing' ri Yo'han eun. Yam sawng' ris ce map' ri hawc' na', Yo'han eun tuil' hk'a' cum' na' ri ce nang klong' Yaw'dan na'. ⁶ Yo'han hk'eung eun hk'eung huik' kalaok' na'. Eun mawt sae'caet' hak'. Eun hk'a' a'htul maeé' leuum' cing' peuyhel' ut' nang hk'i na' ce. ⁷ Eun sangsawn' lah', "A kaw kue' Peue ing' hk'a'kui' ui' ti peue, tí'ca Eun na' a keuting hk'ai' ui'. Pal yawo kaw ui' un' kuing' ri gaw' ri kah' mu' jhaep' Eun na'. ⁸ Tuil' ui' hk'a' cum' na' ri pé' ri leuum' na', daecti Eun kaw tuil' hk'a' cum' na' ri pé' ri Cit' seunga' chak' na'."

Yesu' rap Eun ri ti hk'a' cum'

* 1:2 1:2 Malahki' 3:1 † 1:3 1:3 I'saya' 40:3

⁹ Yam awn' na, Yesu' Eun pucti neum veng Nasaraet' kuing' Galilae' na', Eun ing' rap ri ti hk'a' cum' ri Yo'han eun nang klong' Yaw'dan na'. ¹⁰ Yam Yesu' keulawn' puc Eun ri lih neum leuum' na', Eun pun ri nyu kuing' pang maó' na' a dah'. Cit' seunga' na' a seun' gui' na' a lih ut' maeé' Heun. ¹¹ Hawc' ko', seng' na' a laws' lih neum pang maó'. A lah', "Meuh Mi Kon' me Ui', Ui' leumeus' Mi nyawk'. Mi hit' ri hpum' Ui' nyawk'."

Yesu' pun Eun ri hkam' hk'a' cop'long

¹² Hawc' ko', Cit' seunga' na' a keulawn' va Eun heul' nang vang hk'oh'hk'oeng' na'. ¹³ Eun pun ri hkam' hk'a' cop'long ka Satan na' pun'kul' seunyi teh'. Eun ut' maeé' sat' hk'i na' ce. Hawc' ko', in'hpom ce lih yeuh mhai' Eun.

¹⁴ Hawc' hk'awng' peue Yo'han eun nang htawng' na', Yesu' Eun heul' nang kuing' Galilae' na'. Eun sangsawn' leukah' mun' ren'kawn Eun Peucawo' na'. ¹⁵ Eun lah', "Rot a yam ka hawc', kuing' Eun Peucawo' na' rot a de hawc'. Taws' hpum' fuin map' ri yum' leukah' mun' ren'kawn na' reu'."

Yesu' klawng Eun tapae' kawn' la ri pun' peue

¹⁶ Yam Yesu' heul' Eun keunam ka glu Galilae' na', Eun nyu Si'mon maeé' awng' eun na' eun muis Andre. Ka buih ploé' reup nang glu na', kopti meuh ka peue sok ka'. ¹⁷ Yesu' Eun lah' a ri ka, "Hot' Ui' reu'. Kaw Ui' tuil' pa' meuh peue sok peue seun' sok pa' ka' na' ko'." ¹⁸ Ka keulawn' tec reup ri na', ka hot' Eun heul'.

¹⁹ Yam Yesu' tang suip Eun hk'a' ri na' heul' na', Eun nyu Yakop' meuh kon' me eun Yebedae' maeé' Yo'han meuh awng' eun Yakop' na' ut' ka nang reu na'. Ka buih leuplu reup ri. ²⁰ Yesu' Eun keulawn' klawng ri ti ka. Ka tec Yebedae' kuiing' ri na' eun maeé' peue rapcang' na' ce nang reu na', ka hot' Yesu' Eun heul'.

Yesu' ra Eun ri tec seuca' rai

²¹ Yesu' Eun mae' tapae' Eun na' ce heul' nang veng Kapeni'um na'. Yam rot a seunyi Sin' na', Yesu' Eun ing' lec nang sa'la vang hk'o' mun' na'. Eun tang' ri sangsawn' peue. ²² Peue am' ri ku' sangsawn' Eun na' nyawk' kopti sangsawn' Eun ce seun' peue kue' ti'ca na' ko', Eun un' seun' peue guil leukah' ritroe na' ce. ²³ Yam awn' na, nang sa'la vang hk'o' mun' na' a kue' peue seuca' rai lec ti peue. Eun klawng ri lah' a, ²⁴ "Yesu' peue veng Nasaraet', Mi ci' lo' keunhaw' ri ye? Kaw Mi ing' yeuh ye lu aw? Yawng ui' Mi. Meuh Mi peue seunga' chak' Eun Peucawo'."

²⁵ Yesu' Eun hae' eun. Eun lah', "Dit' mi. Puc mi heul' hk'ai' heun reu'." ²⁶ Seuca' rai na' a yeuh peue awn' eun keuyuing' glhawk' glhawk', ta'ul' aec'rak. Hawc' ko', a pucti heul' hk'ai' heun.

²⁷ Peue gawm'euc' na' ce am' nyawk'. Ce lah' a ri puri, "Aen' a ci' meuh ku' yeuh sa'nhaw'?' Meuh a ku' sangsawn' hk'u'. A ku' kue' ti'ca. A rot ti' tuil' Eun leukah' ri seuca' rai na', a ku' leuceng a yeut." ²⁸ Lawng Eun na' a keulawn' seutu in seutan heul' nang kuing' Galilae' na' hk'awp'.

Yesu' bai' Eun peue peuyhat cuin heun' peue

²⁹ Yam puc ce ri lih neum sa'la vang hk'o' mun' na', Yesu' Eun mae' tapae' Eun na' ce bae' Yakop' mae' Yo'han ce va puri ing' lec nang nya ka Si'mon mae' Andre na'. ³⁰ A'oe' eun Si'mon peuyhat kuc' ha'lok ka, ka it'. Ce ris Yesu' Eun mhawng' a. ³¹ Yesu' Eun ing' jhawp' ti' ka na', Eun vuh ka kuh'. Peuyhat kuc' ha'lok ka na' a cuin. Ka nghawm' ce hk'asom'.

³² Yam seunyi lec ka a sunsam na', peue va peue peuyhat mae' peue seuca' lec na' ce ing' ri Yesu' Eun. ³³ Peue veng na' ce gawm'euc' ce ing' cu ri keunam ka leuva' na'. ³⁴ Yesu' Eun bai' peue peuyhat heun' ceu na' ce cuin heun' peue. Eun ku ra ri tec seuca' na' pucti lih heun'

tu'. Daecti Yesu' Eun un' kah seuca' na' leukah', kopti Yesu' Eun ci' meuh a'nhaw' na' yawng ce a yeut.

Yesu' heul' hk'o' mun' vang cumyen'

³⁵ Peunngup cawo yam un' nang ceng' ka na', Yesu' Eun kuh' heul' hk'ai' nya na'. Eun heul' ri vang yen'yong na', Eun heul' hk'o' mun'. ³⁶ Si'mon eun mae' peue ut' mae' heun na' ce heul' sok Yesu' Eun. ³⁷ Yam nyu ce Yesu' Eun na', ce lah' a ri Heun, "Sum' meuh a'nhaw' ce ku buih sok Mi."

³⁸ Yesu' Eun top' a, "Punta kaw Ui' sangsawn' peue ut' nang yung' caona' tawk seubu na' ce na', e' na' heul' ri ka pawh. Lih Ui' kopti punta kaw Ui' yeuh kan' aen' na."
³⁹ Kop awn' na, Eun heul' nang kuing' Galilae' na' hk'awp'. Eun sangsawn' nang sa'la vang hk'o' mun' ce na'. Eun ra ri tec seuca' heun' tu' na'.

Yesu' bai' Eun peue naw cuin

⁴⁰ Peue naw ti peue na' eun ing' seukluin ri nanggal' Eun Yesu'. Eun hk'o' hk'ang a ri Yesu' Eun, "A lawn htuk' hpum' Mi ko', kaw Mi cang yeuh ui' seunga' chak'."

⁴¹ Kopti Yesu' tuckyak Eun ri heun na', Eun nyat' ti' ri paic' eun. Eun lah', "Htuk' a hpum' Ui' yeut, seunga' chak' reu'." ⁴² Peuyhat naw eun na' a keulawn' rai', eun cuin.

⁴³ Yesu' Eun keulawn' cus' eun heul', Eun tuil' leukah' reng ri heun, ⁴⁴ "Pawlaee lah' lawng aen' a ri peue saec' ti peue. Daecti peuyhat mi na' cuin ka hawc' na' punta kaw a meuh sa'hki' ri peue heun' na' ce, heul' tuil' peue jhawp' rit na' ce nyu tu' mi na' mae' heul' tan ku' tan seun' Mo'se tuil' eun ri uin' leukah' to' ri punta kaw yeuh ri seunga' na' reu'." ⁴⁵ Daecti eun pucti heul' sae'caee' lah' peue mhawng' lawng aen' na' hk'awp'. A yeuh Yesu' Eun un' laee cang lec nang veng na' glih'gleueng'. Eun ut' nang vang geup'

hk'a' nok veng na'. A saec' yeuh sa'nhaw', peue ut' ku duih' na' ce ku kaw' meung ing' ri ri Heun.

2

Yesu' bai' Eun peue ti' cung chuing' cuin

¹ Hawc' awn' na lal' loe' seunyi yam Yesu' tang ing' Eun nang veng Kapeni'um na' bae, peue pun ri mhawng' ing' Eun ti nya na'. ² Kop awn' na, peue cum heun' na' ce ing' cu hk'on' ri mawn', saec' meuh hk'a' nok bawl' leuva' na' a ku hk'o' a un' laee kue' vang ut' yeut. Yesu' Eun sangsawn' leukah' mun' ren'kawn na' ri ce. ³ A kue' peue pun' peue ce jong' peue ti' cung chuing' ti peue ing' ri Heun. ⁴ Daecti ce un' cang ing' ri Yesu' Eun kopti peue na' nuknhen' nyawk' ce na'. Kop awn' na, ce huk' yah pang lhung' ka nya na' roc' ring vang Yesu' ut' Eun na'.* Hawc' ko', ce ploé' peue ti' cung chuing' awn' eun lih gawm' hk'eung it' eun na'. ⁵ Yam Yesu' nyu Eun hk'a' yum' ce na', Eun lah' a ri peue ti' cung chuing' na' eun, "A'ai', map' mi na' ploé' a ri hawc'."

⁶ Peue guil leukah' ritroe mok' mawn' na' ce ngon' ce sawng' kuit a nang hpum' ri, ⁷ "A ci' meuh kop keunhaw' peue awn' Eun vaeé' lah' a yeuh keutit'. Buih lah' Eun ku un' nawpsang ri Peucawo' Eun. A lawn un' meuh yawo Peucawo' Eun koe ko', a'nhaw' hkuin' cang ploé' map' na' gah'."

⁸ Ku' buih kuit ce hk'a'nae hpum' ri na', Yesu' Eun keulawn' yawng a hk'a'nae cit' ri. Eun lah', "A ci' meuh kop keunhaw', pe' vaeé' kuit a nang hpum' ri yeuhki?" ⁹ 'Map' mi na' ploé' a ri hawc'.' Na' Ui' lah' a yeuh keutit' ri peue ti' cung chuing' na' eun, a na' sam'ran aw? A'ko', 'Kuh' klawm' hk'eung it' mi na' long hk'a' ing' reu'.

* **2:4** 2:4 Nya ce peue I'sarela' na' seubul keuleung ka. A lawn rot yam ron ko', ce huk' it' ri ka. Ce tawm hku' na', ce lup a ri tui'.

Leukah' nangnhaw' a ci' na' ca ri sam'ran? ¹⁰ Daecti sum' kah Ui' pe' yawng, Kon' ai' peue na' punta kaw Eun ploé' map' na', Eun kue' ti'ca nang lok na'." Hawc' ko', Eun lah' a ri peue ti' cung chuing' na' eun, ¹¹ "Kaw Ui' lah' a ri mi, kuh' klawm' hk'eung it' mi na' ing' ti nya mi reu'." ¹² Eun ku kuh' klawm' hk'eung it' ri na' pucti heul' nanggal' ce peue cum heun' na'. Peue heun' na' ce am'. Ce suk' seun' Peucawo' Eun. Ce lah', "E' hkuin' nang duing nyu ku' yeuhko' saec' ti pok."

Yesu' klawng Eun Levi' eun

¹³ Yesu' Eun tang heul' keunam glu na' bae. Peue cum heun' na' ce ing' ri Heun. Eun tang' ri sangsawn' ce. ¹⁴ Yam tang heul' Eun hk'a' nanggal' na', Eun nyu Levi' kon' me eun Alfeas' na' mok' eun nang tup' cep' hkawn' na'. Yesu' Eun lah' a ri heun, "Hot' Ui' heul' reu'." Levi' eun ku kuh' hot' Yesu' Eun heul'.

¹⁵ Yam Yesu' mok' Eun ri som' pul nang nya eun Levi' na', peue cep' hkawn' maeé' peue map' na' ce heun' peue ce ku mok' ri som' maeé' Heun maeé' tapae' Eun na' ce tiduih' yeut, kopti peue hot' Yesu' Eun na' heun' ce. ¹⁶ Yam peue guil leukah' ritroe ku' meuh peue Hparisae' na' nyu ce Yesu' som' Eun maeé' peue map' maeé' peue cep' hkawn' na' ce tiduih' na', ce mhaing' tapae' Eun na' ce, "A ci' meuh kop keunhaw' Eun vaeé' som' maeé' peue cep' hkawn' maeé' peue map' na' ce?"

¹⁷ Yam Yesu' mhawng' Eun yeuh a keutit' na', Eun lah' a ri ce, "Peue ut' sam'ran na' un' lo' ce seura' bai', peue peuyhat na' lo' ce koe. Hpaw Ui' ca' lih kopti punta kaw Ui' klawng ri ti peue leupaws seumeu' na' ce, daecti lih Ui' pun peue map' na' ce."

Mhaing' Yesu' Eun ri lawng eut' ku' hk'a

18 Yam awn' na, tapae' eun Yo'han na' ce maeé tapae' ce peue Hparisae' na' ce buih eut' ku' hk'a ri. Ngon' ce ing' mhaing' Yesu' Eun, "Tapae' eun Yo'han na' ce maeé tapae' ce peue Hparisae' na' ce buih eut' ku' hk'a ri, a cí meuh kop keunhaw' tapae' Mi na' ce vaeé un' eut' ku' hk'a ri?"

19 Yesu' Eun top' a, "Yam me pen' na' kaw'n ut' eun maeé peue ing' hk'a chec' na' ce na', pe' cí kaw cang kah ce eut' ku' hk'a ri yeuh sa'nhaw'? Yam kaw'n ut' eun maeé ce na', ce hkuin' kaw nang cang eut' ku' hk'a ri. 20 Daecti kaw a rot yam ti peue me pen' na' eun gah' hk'ai' ku' hk'a chec' na' ce. Yam awn' na, ce na' eut' ku' hk'a ri yeut."

21 "A'nhaw' hkuin' duing leuplu hpen' hk'u' na' ri hk'o hk'im'. A lawn yeuh keutit' ko', hpen' hk'u' na' a kaw ruit, a na' yat hk'o hk'im' na' gawm res nyawk'. 22 Lheú awn' na, a'nhaw' hkuin' duing seue' leuum' plí' bui hk'u' nang huil' hak' hk'im' na'. A lawn yeuh keutit' ko', leuum' plí' bui na' a kaw res huil' hak' na'. Leuum' plí' bui na' maeé huil' hak' na' a kaw lu gawm' lal' ceu ri. Leuum' plí' bui hk'u' na' a kaw kah ri seue' ri nang huil' hak' hk'u' na' palkoe."

Cawo' ka seunyi Sin'

23 Hk'a'naee seunyi Sin' ti seunyi na', Yesu' Eun hpa' mal' ngho' na' heul'. Yam long ce hk'a' heul' na', tapae' Eun na' ce sec' seukuk ngho' na'. 24 Peue Hparisae' na' ce lah' a ri Yesu' Eun, "Keue' reu', a cí meuh kop keunhaw' ce vaeé yeuh ku' kleuc' ri leukah' ritroe na' hk'a'naee seunyi Sin' na'?"

25 Yesu' Eun top' a, "Yam Davit' eun maeé pu eun na' sum' som' nyawk' ce un' kue' ku' hk'a na', eun cí yeuh keunhaw' na' un' duing lip pe' lawng ka na' aw? 26 Cu yam Abiahta meuh eun peue jhawp' rit keuting na', Davit' eun lec hk'a'naee nya Eun Peucawo' na'. Eun ti ri hk'a hkawomun' tan ri Peucawo' Eun na', eun ku tuil' pu ri na'

ce hk'a a yeut. Hkawomun' awn' a lawn un' meuh yawo peue jhawp' rit na' ce ko', a'nhaw' hkuin' cang hk'a a."

²⁷ Hawc' ko', Eun lah' a ri ce, "Seunyi Sin' na' pleng' a ri pun peue, peue na' peue hkuin' pleng' ri pun seunyi Sin' na'. ²⁸ Kop awn' na, Kon' ai' peue na' meuh Eun Cawo' ka seunyi Sin' na'."

3

Peue ti' chuing' ti peue

¹ Yesu' Eun tang lec hk'a'naee sa'la vang hk'o' mun' na' bae ti pok. Mawn' na' a kue' peue ti' chuing' ti plak' ti peue. ² Peue ngon' na' ce buih sok hk'a' kaw ri tang' map' ri Yesu' Eun. Eun ci' kaw bai' un' bai' peue peuyhat hk'a'naee seunyi Sin' na', ce hot' ri htom' Eun. ³ Yesu' Eun lah' a ri peue ti' chuing' na' eun, "Kuh' ing' cawng nanggal' maen'."

⁴ Hawc' ko', Yesu' Eun mhaing' ce, "Hk'a'naee leukah' ritroe na' a ci' kah e' yeuh keunhaw' hk'a'naee seunyi Sin' na'? Htuk' ri yeuh ku' chak' aw? A'ko', htuk' ri yeuh ku' lu aw? Htuk' ri yeuh a'yu peue pon aw? A'ko', htuk' ri yeuh a lu aw?" Daecti ce dit'ti.

⁵ Yesu' Eun hpawt' ti keue' ri ce rop mae' seungeueng' ri. Kopti hpum' cen' ce na', Yesu' Eun hpum' lu nyawk'. Eun lah' a ri peue ti' chuing' na' eun, "Nyat' ti' mi na' reu'." Eun ku nyat' a. Ti' eun na' a cuin yawo.

⁶ Peue Hparisae' na' ce pucti heul'. Ce ci' kaw cang pun ri toh Yesu' Eun yeuh sa'nhaw' na', ce heul' sa'lit puri mae' peue eun Herot' na' ce.

Peue cum heun' na' hot' ce Yesu' Eun

⁷ Yesu' Eun mae' tapae' Eun na' ce heul' ri glu na'. Peue cum heun' ing' neum kuing' Galilae' na' ce hot' Eun. ⁸ Yam peue heun' na' pun ce ri mhawng' lawng ku' yeuh Eun Yesu' na', peue cum heun' ing' neum kuing' Yu'da,

veng Yeru'salaem, kuing' I'du'me maeé hk'a'teh' ka klong' Yaw'dan na', gawm' peue ing' neum veng Tai'ra' maeé veng Si'don na' ce va puri ing' ri Heun. ⁹ Kopti meuh a peue cum heun' awn' ce na' punta kaw ce un' cang tawk' net Yesu' Eun na', Eun kah tapae' ri na' ce rangraen reu aet' na' ti lhang' pun ri. ¹⁰ Kopti bai' Eun peue na' ce cuin heun' na', punta peue peuyhat na' kaw ce pun ri paic' Eun na', ce tawk' ri ing' ri Heun. ¹¹ Saec' meuh yamnhaw' yam seuca' rai na' pun ce ri nyu Yesu' Eun na', ce ing' nghup' ri nanggal' Eun. Ce klawng ri lah', "Meuh Mi Kon' ai' Eun Peucawo'." ¹² Daecti Yesu' Eun tuil' leukah' reng na' ri ce, Eun un' kah ce lah' meuh ri a'nhaw'.

Yesu' leuk Eun ri ti peue caee ri kul'leual' peue na' ce

¹³ Yesu' huk' Eun pang gong na'. Eun klawng peue htuk' hpum' ri na' ce. Ce ku ing' ri Heun. ¹⁴ Eun tang' peue kul'leual' peue na' ce meuh peue caee ri. Eun kah ce ut' maeé ti. Eun kaw cus' ce heul' sangsawn' leukah' mun' ren'kawn na'. ¹⁵ Eun tuil' ti'ca kaw cang ra ri tec seuca' na' ri ce. ¹⁶ Peue caee Eun Yesu' kul'leual' peue awn' ce a meuh Si'mon (ku' Yesu' ghuk' Eun eun muis Petru'), ¹⁷ Yakop' kon' me eun Yebedae' maeé Yo'han awng' eun Yakop' (ku' Yesu' ghuk' Eun ka muis Bo'aneyes', vangdoh' ka na' a lah' kon' neumhk'i), ¹⁸ Andre, Hpi'lip', Bahto'lome', Mahtae, Hto'mas', Yakop' kon' me eun Alfeas', Htadeas', Si'mon ku' klawng peue eun meuh peue ritroe reng na' eun ¹⁹ maeé Yu'das' I'sakariot' ku' kaw fuin Yesu' Eun na' eun.

Yesu' Eun maeé ro' seuca' muis Be'el'sebu'

²⁰ Hawc' awn' na, Yesu' Eun tang lec nang nya na'. Peue cum heun' na' ce tang cu ri ing' baeé, a hk'o' Yesu' Eun maeé tapae' Eun na' ce un' laee tawn ri hk'asom'. ²¹ Yam peue nya peue hk'ul' Eun Yesu' na' pun ce ri mhawng'

lawng awn' a na', ce lah', "Ma'rat Eun hawc'." Ce ing', ce kaw ing' mawt ri ti Eun.

²² Peue guil leukah' ritroe lih neum veng Yeru'salaem na' ce lah', "Ro' ka seuca' muis Be'el'sebu' na' lec ka Eun. Eun cu ti'ca ka na' Eun ra ri tec seuca' na'."

²³ Yesu' Eun klawng ce ing'. Hawc' ko', Eun lah' a ri ce ri leukah' leupong' na', "Ro' ka seuca' na' a ci' kaw ra ri tec seuca' na' yeuh sa'nhaw'?"* ²⁴ Kuing' ti kuing' na' a lawn ces ri puri meun ko', kuing' awn' a hkuin' kaw cang keutawn'. ²⁵ Nyahk'ul' ti nya na' a lawn ces ri puri meun ko', nyahk'ul' awn' a hkuin' kaw cang keutawn'. ²⁶ Seuca' na' a lawn to'tam' puri meun mae' ces ri puri meun ko', a hkuin' kaw cang keutawn'. A kaw lulaic heul'. ²⁷ Neumneum ka na' ko', peue lawn un' nang mawt ri uin' peue kaw'ring keuting na' eun nanggal' hawc' ko', a'nhaw' hkuin' kaw cang ing' lec ri rim' ri ti vahtu' hk'il' leumuil ka nya eun na' saec' ti peue. ²⁸ Kaw Ui' lah' a ri pe' neumneum, map' yeuh peue na' mae' leukah' un' nawpsang lah' peue na' gawm'euc' ka kaw a cang ploé' ri. ²⁹ Daecti saec' meuh a'nhaw', eun lawn un' nawpsang Cit' seungá chak' na' ko', map' eun na' a hkuin' kaw cang ploé' ri, eun kaw pun ri hkam' map' cot'cu na'."

³⁰ Kopti lah' ce seuca' a lec Eun na', Eun lah' a yeuh keutit'.

Ma Eun Yesu' mae' awng' me Eun na' ce

³¹ Ma Eun Yesu' mae' awng' me Eun na' ce ing' rot. Ce cawng hk'a'nok. Ce kah peue ing' klawng Yesu' Eun. ³² Peue cum heun' na' ce mok' rop Eun. Ce lah' a ri Heun, "Ma Mi ka mae' awng' me Mi na' buih ko' ce Mi hk'a'nok."

* **3:23** 3:23 Nang htawm Seungá na' ngon', a lah' a yeuh keutit', "Satan na' a ci' kaw ra ri tec Satan na' yeuh sa'nhaw'?"

³³ Yesu' Eun mhaing' ce, "Ma Ui' mae' awng' me Ui' na' ce ci' meuh a'nhaw'?"

³⁴ Hawc' ko', Eun hpawt' ri keue' ri peue mok' rop ri na' ce. Eun lah', "Hkaen' meuh ce ma Ui' mae' awng' me Ui'.

³⁵ A'nhaw' lawn yeuh alo Eun Peucawo' na' ko', meuh eun ma Ui' mae' awng' me awng' beun' Ui' yeut."

4

Leukah' leupong' lawng puin' ku' seumal

¹ Yesu' tang sangsawn' Eun ce keunam glu na' bae. Peue cum heun' na' ce ing' cu ri tawk' net Eun a hk'o' Eun ing' lec ri mok' nang reu na'. Peue cum heun' na' ce ut' keunam ka glu na'. ² Eun sangsawn' ce heun' ceu ri leukah' leupong' na'. Eun sangsawn' ce yeuh keutit', ³ "Leuceng a reu'. Peue sang' mal' ti peue na' heul' puin' eun ku' seumal ri. ⁴ Yam puin' eun ku' seumal na', ngon' a hk'ui' nang gon' hk'a'. Sim' na' a ku seut' ri hk'a a euc'. ⁵ Ngon' a hk'ui' nang tak seumu vang keute' na' ril' ka. Kopti keute' na' un' leupeul ka, a yao kaws. ⁶ Daecti kopti un' kue' a res na', yam kuc' na' tat' ka a na', a fit' hk'oh' heul'. ⁷ Ngon' a hk'ui' nang tak kat'. Bang' kat' na' a kaws, a ghuim' a. A hkuin' cang pli', ⁸ Daecti ngon' a hk'ui' vang keute' ngeuo. A kaws, a keuting. A pli' leuoekul' pun, leskul' pun rot tipak' pun."

⁹ Hawc' ko', Yesu' Eun lah', "Peue kue' yhuk' kaw leuceng na' leuceng a meulamlam ri reu'."

¹⁰ Yam ut' koe ce na', tapae' kul'leual' peue na' mae' peue ut' rop Eun na' ce ing' mhaing' Eun ri lawng ka leukah' leupong' awn' na. ¹¹ Eun top' a ri ce, "Lawng ka kuing' Eun Peucawo' ku' mo' ri geup' na' kaw pe' kue' ahkvang yawng a. Daecti peue seubu na' ce ko', Ui' kaw lah' lawng ku ceu na' ri ce ri leukah' leupong' na' palkoe.

¹² Kopti,

'Ce saec' keue', ce hkuin' nyu.

Ce saec' mhawng', ce hkuin' ceng'.

A lawn un' yeuh keutit' ko', ce kaw tang hpawt' ri ing', ce kaw pun ploé map' ri.' ”*

¹³ Hawc' awn' na Yesu' Eun lah' a ri ce, “Un' nang ceng' pe' ri leukah' leupong' na' aw? A lawn yeuh keutit' ko', pe' ci' kaw cang ceng' ri leukah' leupong' ku' seubu na' ce yeuh sa'nhaw'? ¹⁴ Peue sang' mal' na' puin' eun leukah' mun' ren'kawn na'. ¹⁵ Peue ngon' na' ce seun' ku' seumal puin' ri nang gon'hk'a' na', yam keulawn' pun ce ri mhawng' leukah' mun' ren'kawn na', Satan na' a ing' ti leukah' mun' puin' ri hk'a'naee ce na' heul'. ¹⁶ Peue ngon' na' ce seun' ku' seumal puin' ri nang tak seumu na', yam pun ce ri mhawng' leukah' mun' ren'kawn na', ce keulawn' ren'kawn rap ri ti a. ¹⁷ Daecti kopti res ka na' un' lec ka rui' na', leukah' mun' ren'kawn na' a ut' maeé' ce ti cu hkao'. Yam hk'eup' ce ku' kuit nyhap', a'ko' ku' keunhap' nokneh kopti meuh a leukah' mun' ren'kawn na', ce ku keulawn' tecla a. ¹⁸ Peue ngon' na' ce seun' ku' seumal puin' ri nang tak kat' na'. Ce mhawng' leukah' mun' ren'kawn na', ¹⁹ daecti ku' kuit nyhap' hk'a'naee yam a'yu im' na', hk'a' ren'kawn maeé' hk'il' leumuil na' maeé' hk'a' sé'dai' vahtu' hk'il' leumuil na' ing' ghuim' a leukah' mun' ren'kawn na'. A yeuh leukah' mun' ren'kawn na' un' cang kue' pli'. ²⁰ Peue seubu na' ce seun' ku' seumal puin' ri nang vang keute' ngeuo na'. Ce mhawng' leukah' mun' ren'kawn na', hawc' ko' ce rap ri ti a. A pli' lheu' ku' puin' ri na' leuoekul' pun, leskul' pun rot tipak' pun.”

Tok' kaw' ngawl un' duing kuip a

²¹ Yesu' Eun lah' a ri ce, “Tok' pe' kaw' ngawl na' kuip pe' a ri keutong', a'ko' uin' pe' a hk'a'ruim cong it' na'

* 4:12 4:12 I'saya' 6:9, 10

aw? Daecti po pe' a pang hpa'rang na', un' meuh ka aw?
²² Kopti ku' mo' ri na' a kaw pun ri tuh' ri. Ku' kuip ri na' a kaw pun ri ti ri ing' vang ceng' na'.

²³ Peue kue' yhuk' kaw leuceng na' leuceng a reu'."

²⁴ Eun tang lah' a ri ce bae, "Kuit ti nawk ku' pun pe' ri mhawng' na' meulamlam ri reu'. Pe' lawn tung' a nang keunhaw' ri peue ko', pe' kaw tang pun a nang awn' a. Pe' kaw tang pun a bae lheu' awn' na yeut. ²⁵ Ku' kue' na' ce ko', kaw tang tuil' ce bae. Ku' un' kue' na' ce ko', kaw tang hue' ku' kaw' kue' ce na' lih hk'ai' ce."

Leukah' leupong' lawng ku' seumal kaws

²⁶ Yesu' Eun ku lah', "Kuing' Eun Peucawo' na' seun' a peue ti peue puin' eun ku' seumal pang bhen' keute' na'.

²⁷ Gawm' sum' gawm' seunyi yam it' eun un' lah' yam kuh' eun un' lah', ku' seumal na' a kaws a keuting. Eun saec' un' yawng kaw a kaws yeuh sa'nhaw'. ²⁸ Bhen' keute' na' a yeuh a kaws meuh rong' ri. Hawc' ko', a lih seukuk ri. Hawc' ko', a kue' kui' nuk seukuk ka na'. ²⁹ Yam hk'o' ka na', kopti rot a yam vuic ka hawc' na', eun ku vuic a ri guc' ri na'."

Leukah' leupong' lawng seumal hpapu

³⁰ Eun tang lah', "Kuing' Eun Peucawo' na' a ci' seun' keunhaw'? A'ko', e' ci' kaw lo' leukah' leupong' ceu nangnhaw' ris a? ³¹ Kuing' Eun Peucawo' na' seun' a seumal ka hpapu na'. Yam jheum' a ri pang bhen' keute' na', a meuh ku' seumal aet' hk'ai' ku' seumal seubu na' ce. ³² Daecti yam kaws ka na', a meuh kleum' keuting hk'ai' kleum' ku' seubu nang val na'. Kak' ka na' ce a keuting, sim' peul' eo' nang vawo na' ce ing' pleng' ri is' han' hk'a'nae rum ka na' ce."

³³ Yesu' Eun ku lah' leukah' leupong' seun' aen' na hot' ku' ceng' ce ri ka na' heun' ceu ri ce. ³⁴ Eun lah' yawo leukah' leupong' na' ri ce palkoe. Daecti yam ut' Eun mae'

tapae' ri na' ce koe na', Eun ris ce mhawng' vangdoh' ka na' gawm'euc' ka.

Yesu' ham' Eun guil' na'

³⁵ Seunyi awn' na yam hk'a'pul ka na', Yesu' Eun lah' a ri tapae' ri na' ce, "Pawh, e' tang glu na' heul' hk'a'teh'."

³⁶ Ce va Yesu' Eun lec hk'a'naee reu na'. Ce hk'ah' peue cum heun' na' ce. Reu seubu na' a ku hot' ce heul' yeut.

³⁷ Guil' lomleng keuting na' a puing' ri ing'. Ba leuum' na' a htui'p ri lec reu na' a hk'o' reu na' daee cum'. ³⁸ Yesu' Eun it' ti gung hk'a' seuta' ka reu na'. Tapae' na' ce ing' sawl' Eun. Ce lah', "Cawo', un' kuit nyhap' Mi ri kaw e' cum' nang leuum' na' aw?"

³⁹ Yesu' Eun kuh' ham' guil' na' mae' ba leuum' na'. Eun lah', "Keulawn' yut' ti reu'." Guil' na' a ku keulawn' yut' ti. A yen' ku ceu ri.

⁴⁰ Yesu' Eun lah' a ri tapae' ri na' ce, "A ci' meuh kop keunhaw' pe' vae' lhat'? Un' nang kue' pe' hk'a' yum' aw?"

⁴¹ Tapae' na' ce lhat' ruing nyawk'. Ce lah' a ri puri, "Hkawn' Eun ci' meuh a'nhaw' rot ti guil' mae' ba leuum' na' a ku vae' leuceng leukah' Eun na'."

5

Yesu' bai' Eun peue seuca' lec cuin

¹ Yam rot ce hk'a'teh' ka glu nang kuing' Gerasa' na',

² yam Yesu' puc Eun ri lih hk'ai' reu na', a kue' peue seuca' rai lec ti peue. Eun pucti lih neum keutui' leumuic na', eun buih ing' ri Heun.

³ Eun ut' nang keutui' leumuic na' palkoe. Peue saec' mawt eun ri mu' lhec', daecti peue mawt eun peue hkuin' pun eun keutawn' saec' ti peue.

⁴ Kopti peue saec' tawn mawt ti' cung eun na' ri mu' lhec' heun' pok, daecti eun ku peut' mu' lhec' na' deut. A'nhaw' hkuin' kue' kaw' reng cang yeuh eun o'.

⁵ Eun ta'ul' klawng nang keutui' leumuic na' mae' pang caw'vawc gong na' gawm' sum' gawm' seunyi. Eun ti ri htue' tu' ri na' ri seumu na'. ⁶ Yam nyu eun Yesu' ing' Eun neum seungai na', eun hk'uih ing' seukluin ri nanggal' Eun. ⁷ Eun ta'ul' klawng ri lah' laws' a, "Yesu', Kon' ai' Eun Peucawo' Cawo' lhung' hk'ai' peue na' Mi, Mi ci' lo' keunhaw' ri ui'? Punta kaw Mi un' keunhap' nokneh ui' na', hk'o' Mi yeuh kati ri Peucawo' Eun reu'."

⁸ Eun lah' a yeuh keutit' kopti Yesu' lah' Eun a ri heun, "Seuca' hk'aw'jeuk na' mi, puc mi heul' hk'ai' peue awn' eun reu'." ⁹ Hawc' ko', Yesu' Eun mhaing' eun, "Mi ci' muis keunhaw'?"

Eun top' a, "Kopti heun' tu' ye, ui' muis Cum." ¹⁰ Eun hk'o' hk'ang Yesu' Eun un' ra ri hk'uih hk'ai' vang ut' awn' na.

¹¹ Vang un' seungai ka mawn' na', a kue' lic cum keuting ti cum a saee eo' ri pang gong na'. ¹² Seuca' na' ce hk'o' hk'ang a ri Yesu' Eun, "Hk'o' Mi kah ye heul' lec lic cum teh' ce reu'." ¹³ Yam Yesu' kah Eun ce heul' na', seuca' na' ce pucti heul' hk'ai' peue awn' eun, ce heul' lec lic na'. Hawc' ko', lic cum kue' hk'ao la' heng' tu' na' ce yawt' ti hk'ui'c' hk'ai' leuang' na', ce hk'ui'c' yeum nang glu na' gawm'euc'.

¹⁴ Peue go' lic na' ce hk'uih ing' eo' ri lah' peue mhawng' lawng awn' a nang veng nang yung' na' hk'awp'. A ci' meuh ku' yeuh sa'nhaw', peue heun' na' ce va puri heul' nawk a. ¹⁵ Yam heul' rot ce ri Yesu' Eun na', ce pun ri nyu peue ku' seuca' rai cum heun' lec ka eun na' cuip' eun hk'ohk'eung ri eun pawn kui' ri mok' mawn', ce lhat' nyawk'. ¹⁶ Peue pun ri nyu lawng peue seuca' lec ka na' eun mae' lawng ka lic na' ce ris peue heul' nawk na' ce mhawng' a.

¹⁷ Kop awn' na, ce hk'o'hk'ang Yesu' Eun pucti heul' hk'ai' vang ut' ri na'. ¹⁸ Yam Yesu' kaw Eun lec hk'a'naee reu na', peue ku' seuca' rai tawn lec ka eun na' eun ing' hk'o'hk'ang ri kaw hot' Eun heul'. ¹⁹ Yesu' Eun un' kah eun hot' ri heul'. Daecti Eun lah', "Ing' ti nya mi, lawng Peucawo' Eun ci' teum'kawm mi a'ngeng mae' Eun ci' tukyak ri mi yeuh sa'nhaw' na', ing' ris peue nya peue hk'ul' mi na' ce mhawng' a reu'." ²⁰ Eun ku pucti heul' ris peue mhawng' lawng Yesu' teum'kawm eun ri a'ngeng na' nang kuing' Dekapo'lis' na'. Peue gawm'euc' na' ce am' nyawk'.

Kon' nyom beun' yeum mae' beun' nham' lih

²¹ Yesu' Eun pawk reu heul' hk'a' tawk seubu ka glu na'. Yam kawn' ut' Eun keunam ka ba leuum' na', peue cum heun' na' ce ing' cu ri mae' Heun. ²² Ro' ka sa'la vang hk'o' mun' muis Yai'ras' na' eun ing' mawn'. Yam nyu eun Yesu' Eun na', eun nghup' ri mae' cung Eun na'. ²³ Hawc' ko', eun hk'o'hk'ang a ri Yesu' Eun mae' hpum' ha' ron ri. Eun lah', "Kon' beun' ui' na' kaw eun yeum. Punta kaw eun cuin a'yu im' na', hk'o' Mi ing' tang' ti' ri hk'a' pang eun reu'." ²⁴ Kop awn' na, Yesu' Eun ku heul' mae' heun.

Peue cum heun' na' ce ku tawk' net hot' Eun heul'. ²⁵ A kue' beun' nham' lih pun kul'leual' neum ti peue. ²⁶ Eun pun ri tukhka nyawk'. Eun euc' paec heun' ri kopti heul' ri ri seura' bai' heun' peue, a hk'o' paec eun euc' hklel'. A htuk' ri meuh hk'ao cuin ka, daecti eun gawm keucu. ²⁷ Yam mhawng' eun lawng Eun Yesu' na', eun hot' to' Eun Yesu' na' heul' meu peue cum heun' na' ce. Eun paic' hk'o' Eun na'. ²⁸ Kopti kuit eun, "Ui' lawn pun ri paic' yawo hk'o' Eun na' ko', ui' kaw cuin." ²⁹ Nham' lih hk'ai' heun na' a keulawn' yat', eun mhawng' tu' ri na' cuin ka hawc'.

³⁰ Yesu' Eun keulawn' mhawng' ti'ca ri na' puc a ri hk'ai' ti. Eun hpawt' ti keue' ri peue cum heun' na' ce. Eun mhaing' ce, "A'nhaw' ci' paic' hk'o Ui' na'?"

³¹ Tapae' Eun na' ce top' a, "Tup nyu Mi peue cum heun' na' tawk' net ce ri. A ci' meuh kop keunhaw' Mi vae mhaing' peue ri, 'A'nhaw' ci' paic' Ui'?" "

³² Daecti punta Yesu' kaw Eun pun ri nyu peue yeuh ku' yeuhki' na' eun, Eun meung hpawt' ti keue' rop ce.

³³ Kopti beun' awn' yawng eun ku' meuh hk'a'nae tu' ri na' meulamlam ri na', eun lhat' keuyuing'. Eun ing' nghup' ri nanggal' Eun Yesu' na'. Eun ris Eun mhawng' lawng ku' meuh neum na' gawm'euc' ka. ³⁴ Yesu' Eun lah' a ri heun, "Kon' beun' Ui', kop meuh a hk'a' yum' mi na', a yeuh mi cuin hawc'. Kuit nyawk' kuit sam'ran pon ku' kuit nyhap' kuit yak na' ing' reu'."

³⁵ Yam kaw'n' buih leukah' Eun na', peue heul' neum nya eun Yai'ras' ro' ka sa'la vang hk'o' mun' na' ce ing' lah', "Kon' beun' mi na' yeum eun hawc'. Mi ci' meung suksak ri Seura' Eun meuh keunhaw' bae?"

³⁶ Yesu' Eun hkuin' leuceng leukah' lah' ce na', daecti Eun lah' a ri ro' ka sa'la vang hk'o' mun' na' eun, "Pawlae kuit nyhap', yum' yawo palkoe reu'." ³⁷ A lawn un' meuh Petru', Yakop' mae' Yo'han awng' eun Yakop' tit' ce ko', Eun un' kah ku' seubu na' ce hot' ri heul' saec' ti peue.

³⁸ Yam ing' rot ce ti nya eun ro' ka sa'la vang hk'o' mun' na', Yesu' Eun pun ri nyu peue na' aec' rak ta'ul' ce ri yam.

³⁹ Eun ing' lec nya na'. Hawc' ko', Eun lah' a ri ce, "A ci' yeuh keunhaw' pe' vae' aec' rak ta'ul' ri yam? Kon' nyom aen' hpaw eun ca' nang yeum, gup kaw'n' it' eun." ⁴⁰ Daecti ce va puri keunyas cum Yesu' Eun.

Hawc' Yesu' kah Eun ce pucti heul' na', Eun va makuiing' eun kon' nyom na' ka mae' tapae' ku' ut' mae' Heun na' ce ing' lec vang ut' eun kon' nyom na'. ⁴¹ Yesu' Eun jhawp'

ti' eun kon' nyom na', Eun lah', "Tali'ta Hkum." (Vangdoh' ka na', "Kon' beun', lah' Ui' a ri mi kuh' reu'.") ⁴² Kon' nyom beun' na' eun keulawn' kuh' lawng'laeng' ri heul' (A'yu eun na' a pun kul'leual' neum.) Peue awn' ce am' nyawk' ri lawng awn' na. ⁴³ Yesu' Eun tuil' leukah' reng ri ce, un' kah ce ris lawng aen' na ri peue saec' ti peue. Eun kah ce ti ri tuil' kon' nyom na' eun hk'a ku' hk'a.

6

Peue veng Nasaraet' na' un' rap ce ri ti Yesu' Eun

¹ Yesu' Eun pucti heul' neum teh' na', Eun ing' ri yung' vang ut' ri na'. Tapae' Eun na' ce ku hot' Eun ing'. ² Yam rot a seunyi Sin' na', Eun sangsawn' nang sa'la vang hk'o' mun' na'. Peue pun ri mhawng' a na' ce am' nyawk'.

Ce lah', "Peue awn' Eun ci' pun ku' yeuhki' na' neum tawngnhaw'? Cu'yi pun Eun na' a ci' meuh cu'yi yeuh sa'nhaw', a cang yeuh a rot ti ku' hk'o'am'? ³ Meuh Eun laksa'ma', un' meuh ka aw? Eun meuh kon' ka Mari', ec' ce Yakop', Yo'saep, Yu'das' mae'e' Si'mon, un' meuh ka aw? Awng' beun' Eun na' ut' ce mae'e' e', un' meuh ka aw? Ce nyu Eun pereng ri."

⁴ Yesu' Eun lah' a ri ce, "Peue suip leukah' Eun Peucawo' na' pun Eun munhpung' ri na' ri peue, daecti Eun hkuin' pun hk'a'naee vang ut' ri na', hk'a'naee ec'awng' ri na' mae'e' hk'a'naee nyahk'ul' ri na'." ⁵ A lawn un' meuh yawo tang' Eun ti' ri hk'a'pang ce peue peuyhat bai' ce cuin na' ngon' ko', Eun hkuin' laee pen' yeuh ku' hk'o'am' na' mawn' saec' ti ceu. ⁶ Yesu' Eun am' ri un' cang yum' ce.

Yesu' cus' Eun tapae' kul'leual' peue na' ce pucti heul'

Hawc' awn' na, Yesu' Eun heul' sangsawn' ti yung' hawc' ti yung'. ⁷ Eun klawng tapae' kul'leual' peue na' ce ing' ri

ti. Eun cus' ce pucti heul' meuh ku ri. Eun tuil' tí'ca cang pe seuca' rai ná' ri ce.

⁸ Eun tuil' leukah' ri ce. Eun lah', "A lawn un' meuh yawo hku'ji ko', pawlaee pin' keunhaw' heul' saec' ti ceu. Pawlaee pin' ku' hk'a, pawlaee pin' huil', pawlaee seue' paec hk'a'naee sae'caet' pé' ná' heul'. ⁹ Cui'p' jhaep' heul', daecti pawlaee rangraen hk'o lheu' ku' cui'p' pé' ná' heul'. ¹⁰ Yam pun pé' ri lec nya nangnhaw' ná', ut' yawo nang nya awn' a palkoe rot ti puc pé' ri heul' hk'ai' veng awn' a ná' reu'. ¹¹ Saec' meuh tawngnhaw' peue lawn un' rap ri ti pé', a'ko' un' leuceng leukah' pé' ná' ko', yam puc pé' ri heul' hk'ai' veng awn' a ná', punta kaw a meuh sa' hki' Peucawo' kaw Eun ciyang ce ná', raws' ri tec peuluing pit dak cung pé' ná' reu'."

¹² Tapae' ná' ce pucti heul' sangsawn' kah peue taws' hpum' fuin map' ri. ¹³ Ce ra ri tec seuca' ná' heun' tu'. Ce lhuik' peue peuyhat heun' peue ná' ce ri lamawn, ce bai' ce cuin.

Yo'han cawo' tuil' hk'a' cum' yeum eun

¹⁴ Kopti lawng Eun Yesu' ná' seutuun seutan laws' ka heul' ná', hkun'haw' hkam' Herot' eun pun ri mhawng' a. Ngon' peue lah', "Yesu' Eun meuh Yo'han cawo' tuil' hk'a' cum' ná' yeum eun, eun tang kuh' im'. Kop awn' na, a yeuh Eun kue' tí'ca cang yeuh ku' hk'o'am' ná' ce."

¹⁵ Ngon' peue lah', "Eun meuh E'li'ya eun."

Peue seubu ná' ce ngon' ce lah', "Eun meuh peue suip leukah' Eun Peucawo' seun' peue suip leukah' Eun Peucawo' leumah' ná' ce yeut."

¹⁶ Daecti yam cawo' Herot' pun eun ri mhawng' a ná', eun lah', "Peue aen' meuh eun Yo'han ku' kah ui' peue reng' ngok eun ná' eun. Eun tang kuh' im' hawc'."

¹⁷ Kopti cawo' Herot' eun meun kah eun peue heul' mheut' ri seue' Yo'han eun nang htawng' kopti cawo'

Herot' ti eun Herodí beun' eun Hpi'lip' ku' meuh awng' ri na' ka meuh beun' ri na'. ¹⁸ Kopti Yo'han tawn lah' eun a ri cawo' Herot' eun, "Kopti ti mi beun' eun awng' ri na' ka meuh beun' ri na', mi yeuh ku' kleuc' ri leukah' ritroe na'." ¹⁹ Kop awn' na, Herodí ka ces ri Yo'han eun. Ka sum' toh eun, daecti a hkuin' cang. ²⁰ Kopti cawo' Herot' lhat' eun ri Yo'han eun, eun roksa' eun kopti yawng eun Yo'han meuh eun peue leupaws seumeu', peue seunga' chak' na'. Yam cawo' Herot' pun eun ri mhawng' leukah' sangsawn' eun Yo'han na', hpum' eun na' a saec' suksak, daecti eun kaw'n sum' leuceng a.

²¹ Vang tisut' ka na', a rot yam htuk' lai ri Herodí ka. Hk'a'naee pawe seunyi keut' eun cawo' Herot' na', eun klawng hkun' keuting, po' suik' keuting maeé ro'kan ut' nang kuing' Galilae' na' ce ing' hk'asom' tiduih'. ²² Yam kon' beun' ka Herodí ing' cha eun ri na', a htuk' hpum' eun cawo' Herot' maeé peue chec' na' ce nyawk'.

Kop awn' na, cawo' Herot' eun lah' a ri kon' beun' na' eun, "Hk'o' ku' sum' is' mi na' reu', seun' hk'o' mi a na' ui' kaw tuil' a ri mi." ²³ Lheu' awn' na eun hkam' a, "Mi saec' hk'o' keunhaw', ui' kaw tuil' a ri mi gawm'euc', rot ti kuing' ui' na' ti plak', ui' kaw tuil' a ri mi yeut."

²⁴ Kon' beun' na' eun heul' mhaing' ma ri ka, "Ui' cí na' htuk' ri hk'o' keunhaw'?"

Ma eun ka lah', "Hk'o' cing' eun Yo'han cawo' tuil' hk'a' cum' na' reu'."

²⁵ Eun keutah ing' lah' a ri hkun'haw' hkam' eun, "Sum' is' ui' cing' eun Yo'han cawo' tuil' hk'a' cum' na' seue' a nang paen' hpan na' tuil' a ri ui' maet'maen' reu'." ²⁶ Hkun'haw' hkam' Herot' eun kuit nyhap' nyawk'. Daecti kopti hkam' eun a hawc' na' maeé kopti keue' eun ri buh ce peue chec' na', eun un' laee cang lheu' ku' hk'o' eun kon' beun' na'. ²⁷ Kop awn' na, eun keulawn' tuil' leukah' kah

peue suik' ri na' eun heul' reng' ri ti cing' eun Yo'han na' ing'. Peue suik' na' eun ku heul' reng' cing' eun Yo'han na' nang htawng' na'. ²⁸ Hawc' ko', eun seue' cing' na' nang paen' hpan na' ing' tuil' a ri kon' beun' na' eun. Kon' beun' na' eun ti ri tuil' a ri ma ri ka. ²⁹ Yam tapae' eun Yo'han na' pun ce ri mhawng' lawng awn' a na', ce ing' ti ri heul' seue' tu' yeum eun na' nang keutui' leumuic na'.

Yesu' tuil' Eun peue hpawn'heng' na' ce som'

³⁰ Peue caee Eun Yesu' na' ce ing' cu ri mae' Yesu' Eun. Ce ris Eun mhawng' ku' yeuh ku' sangsawn' ri na' ce gawm'euc' ka. ³¹ Kopti yam awn' na peue na' heul'heul' ing'ing' ce heun' nyawk', ce hkuin' laee tawn ri hk'asom'. Yesu' Eun lah' a ri tapae' ri na' ce, "E' heul' keului' ri nang vang yen'yong ti duih' na' pawh."

³² Kop awn' na, ce pawk reu heul' ri nang vang yen'yong ti duih' na'. ³³ Daecti peue heun' peue pun ri nyu puc ce ri heul' na' ce pawn ce. Peue ut' ku veng na' ce va puri hk'uih heul' rot teh' nanggal'. ³⁴ Yam Yesu' lih Eun hk'ai' reu na', Eun nyu peue cum heun' na' ce. Kopti seun' ce kon'yung' un' kue' cawo' go' na', Eun tuckyak ri ce nyawk'. Eun tang sangsawn' ce ri lawng heun' ceu na'.

³⁵ Yam rot a hk'a'pul na', tapae' Eun na' ce ing' lah' a ri Heun, "Maen' na' seungai ka, a kaw hk'aws' fec' hawc'. ³⁶ Kah peue aen' ce heul' eo' ri leuvaee ku' hk'a nang yung' caona' na' ce meun reu'."

³⁷ Daecti Eun top' a, "Pe' ri tuil' ce som' reu'."

Tapae' eun na' ce lah', "Kaw e' ti paec leual'pak' htaep'* e' na' heul' leuvaee ri tuil' ce hk'a ku' hk'a aw?"

³⁸ Yesu' Eun mhaing' ce, "Pe' ci' kue' hkawomun' a' neng meul', heul' nom' nawk a reu'."

* **6:37** 6:37 Paec ti htaep' na' meuh a ngos reng peue ti peue yeuh eun kan' ti seunyi.

Yam pun ce ri yawng a na', ce tang ing' lah', "Kue' a hkawomun' hpawn' meul' mae' ka' lal' tu'."

³⁹ Hawc' ko', Yesu' Eun kah tapae' ri na' ce kah peue heun' na' ce mok' meuh cum ri pang rip seungal na'. ⁴⁰ Ce ku mok' meuh cum ri, cum ka tipak' peue, a'ko' cum ka hpawn' kul' peue. ⁴¹ Hawc' Yesu' ti Eun hkawomun' hpawn' meul' mae' ka' lal' tu' na' ing' na', Eun mung' ma' na', Eun mun' keuting ri Peucawo' Eun. Hawc' ko', Eun ves ri tuil' hkawomun' na' ri tapae' ri na' ce. Ce gvah a ri peue heun' na' ce. Yesu' Eun ku gvah ka' lal' tu' na' ri peue heun' na' ce hk'awp' yeut. ⁴² Peue gawm'euc' na' ce pun ri hk'a ri sak' ku peue ri. ⁴³ Tapae' na' ce seut' hkawomun' mae' ka' ku' lheu' ka na' a pun kul'leual' teng' nuk. ⁴⁴ Peue hk'a ku' hk'a na' ce, me na' ce palkoe, ce kue' hpawn'heng' peue.

Yesu' Eun long pang hak' leuum'

⁴⁵ Yam Yesu' buih am'la Eun peue cum heun' na' ce, Eun keulawn' kah tapae' ri na' ce lec reu na' bai heul' hk'a'teh' glu nang veng Betsai'da' na'. ⁴⁶ Hawc' gah' Eun hk'ai' peue cum heun' na' ce, Eun huk' hk'o' mun' pang gong na'.

⁴⁷ Yam duim' ka na', reu ce tapae' na' a rot nang ngon' ka glu na'. Yesu' Eun ut' koe keunam hk'a'maen' ka glu na'. ⁴⁸ Eun nyu tapae' ri na' sae'caee' ce fai' reu na' heul', kopti guil' reng na' ing' htui'p a ce. Yam kaw a hk'aws' ceng' na', Yesu' Eun long pang hak' leuum' na' heul' ri ce. Eun kaw pukal' ce, ⁴⁹ daecti yam nyu ce long Eun pang hak' leuum' na', ce hteum' Eun meuh hpet'. Ce aec'rak laws', ⁵⁰ kopti nyu ce Eun gawm'euc' ti, ce tok'seupa lhat' nyawk'.

Yam awn' na, Eun keulawn' leukah' mae' ce, "Yeuh hpum' pe' hat'han' reu'. Meuh ka Ui' ri, pawlaee lhat'." ⁵¹ Hawc' ko', Eun ing' lec reu na' mae' ce, guil' na' a ku yut' ri. Ce am' nyawk'. ⁵² Ce ku un' nang ceng' ri lawng ka hkawomun' na'. Hpum' ce na' a cen'.

⁵³ Yam tang ce glu ná' heul' hk'a'teh' ná', ce tah' reu ná' keunam ka veng Genesaret' ná'. ⁵⁴ Pal yawo kaw'n' puc ce ri lih hk'ai' reu ná', peue pawn Yesu' Eun. ⁵⁵ Peue awn' ce hk'uih heul' ku duih' ka kuing' ná'. Ce jong' peue peuyhat ná' ce gawm' hk'eung it' ri ná' ing' ri vang mhawng' ce Yesu' kaw Eun heul' ná'. ⁵⁶ Yesu' Eun saec' heul' tawngnhaw', nang yung' un' lah', nang veng un' lah', nang pang' un' lah', peue ku jong' peue peuyhat ná' ce ing' vang cu hk'on' peue ri ná'. Ce hk'o' Eun ná' tuil' peue peuyhat ná' ce paic' yawo duing' hk'o ri ná'. Peue pun ri paic' a ná' ce cuin gawm'euc' ri.

7

Ku' seunga' mae' ku' un' seunga'

¹ Peue Hparisae' mae' peue guil leukah' ritroe lih neum veng Yeru' salaem ná' ing' cu ce ri rop Yesu' Eun. ² Ce pun ri nyu tapae' Eun ná' ce ngon' hk'a ce ku' hk'a, ce un' hkuc' ti' ri. A sawn' ri meuh "ku' un' seunga'". ³ (A kue' ritroe á'ta' á'ya ce yeuh ce ing' ti' cu hawc' ti' cu ná', peue Hparisae' mae' peue Yu'da ná' ce gawm'euc' ce lawn un' nang hkuc' ti' ri hot' ritroe ka ná' ko', ce hkuin' hk'a ku' hk'a. ⁴ Yam ing' ce neum keulas ri ná', ce lawn un' nang saic' ku' ti' ri ná' ko', ce hkuin' nang hk'a a yeut. Lheu' awn' na, ce kaw'n' kue' ritroe seubu heun' ceu, u'hpama ri, rit hpak' kawk', hkvak mae' hk'eung hk'a seubu ná' ce.)

⁵ Kop awn' na peue Hparisae' mae' peue guil leukah' ritroe ná' ce mhaing' Yesu' Eun, "Tapae' Mi ná' ce cí' yeuh keunhaw', ce vae' un' hot' ri yeuh ritroe ku' nang kawt tang' ce ri uin' ná'? Ce hk'a ku' hk'a ri ná' ri ti' un' seunga' ri." ⁶ Yesu' Eun top' a, "Ku' I'saya' tamnai eun lawng peue leukah' seunga' hpum' vok' seun' pé' ri ná' a cawp' nyawk'. A tem' ri lah',
'Peue aen' suk'seun' ce Ui' ri moeng ri ná' palkoe,

daecti hpum' ce na' a seungai Ui' nyawk'.

⁷ Faeé' ce Ui' na' a meuh ku' hk'o'hk'awng',
ku' sangsawn' ce na' a meuh yawo ritroe ku' peue
sangsawn' peue puri na'.*

⁸ Pe' tecla leukah' Eun Peucawo' na', pe' jhawp' ritroe ce
peue na'."

⁹ Hawc' ko', Yesu' Eun tang lah' a ri ce, "Punta kaw
pe' hot' ritroe ri na' meun, pe' chanan tecla leukah'
Eun Peucawo' na'. ¹⁰ Kopti Mo'se lah' eun, 'Hkopyawm'
yumyam' ri makuiing' mi ka reu"[†], eun ku lah', 'A'nhaw'
lawn jha' makuiing' ri ka ko', kuing' eun ri pun ri yeum.[‡]
¹¹ Daecti pe' lah', 'A'nhaw' lawn lah' a ri makuiing' ri ka,
"Hk'eung kue' ri ui' ku' kaw kue' mun' pun pa' na' a meuh
Kolban" ' (vangdoh' ka na' a lah' ku' ap tan ri Peucawo'
Eun hawc'), ¹² hawc' ko' pe' hkuin' kah eun teum'kawm
makuiing' ri ka saec' peunae'. ¹³ Kop awn' na, pe' yeuh
leukah' Eun Peucawo' na' hk'o'hk'awng' ri jhawp' pe' ri ti
ritroe ri ing' ti cu hawc' ti cu na'. Ku' seun' awn' a na' pe'
ku kaw' yeuh a heun' ceu yeut."

¹⁴ Hawc' awn' na, Yesu' Eun klawng peue cum heun' na'
ce ing' ri ti. Eun lah', "Pe' ri gawm'euc' leuceng ri yawng
ku' lah' Ui' na' reu'. ¹⁵ Ku' kue' hk'a'nok ing' lec ri yeuh
hk'a'naee tu' peue meuh 'ku' un' seunga' na' a hkuin' kue'
saec' ti ceu. Daecti ku' yeuh eun meuh 'ku' un' seunga' na'
meuh a ku' lih neum tu' eun na' hawc'."

¹⁶ § ¹⁷ Yam gah' Eun hk'ai' peue cum heun' na' ce Eun
ing' lec nang nya na', tapae' Eun na' ce mhaing' Eun ri
lawng leukah' leupong' aen' na. ¹⁸ Yesu' Eun mhaing' ce,
"Un' nang leuceng pun pe' a aw? Ku' kue' hk'a'nok ing'

* ^{7:7} 7:7 I'saya' 29:13 † ^{7:10} 7:10 Pucti heul' 20:12; Saw'n' leukah' mun'
5:16 ‡ ^{7:10} 7:10 Pucti heul' 21:17; Faeé' 20:9 § ^{7:16} 7:16 Nang htawm
Seungá na' ngon', a kue' nambat aet' aen' na. ¹⁶ A'nhaw' kue' yhuk' cang
mhawng' ko', leuceng a reu'.

lec ri yeuh hk'a'naee tu' peue meuh 'ku' un' seunga' na' a hkuin' kue' saec' ti ceu na', un' nyu pe' a aw? ¹⁹ Kopti hpaw a ca' pun ri lec hk'a'naee hpum', daecti lec a hk'a'naee keuteul na', hawc' ko' a pucti heul' hk'ai' tu' na'." (Seun' Yesu' lah' Eun a yeuh keutit' na', Eun sum' lah' ku' hk'a na' gawm'euc' ka a hkuin' to' ri meuh "ku' un' seunga".)

²⁰ Eun tang lah', "Ku' lih neum tu' eun na', a jaen meuh ku' yeuh eun meuh 'ku' un' seunga' na'. ²¹ Kopti ku' pucti lih neum tu' lih neum hpum' na' ce a meuh kamkuit rai, hk'a' len'cu, rabawk' peue, toh peue, hk'a' hkuit'nawng'tang', ²² ta'nha', sum' yeuh peue lu, hpum' un' leupaws seumeu' ri leumuil, kang'kala, hkoe'mang', lah' leukah' nyoe, pak'keutuin, nga' suisa. ²³ Ku' rai aen' ce gawm'euc' ka lih a neum hk'a'naee na', a yeuh peue meuh 'ku' un' seunga'."

Hk'a' yum' ka beun' veng Su'ri'hpe'ni'si'

²⁴ Yesu' Eun pucti heul' hk'ai' mawn' na', Eun heul' nang veng Tai'ra' na'.* Eun heul' lec nang nya ti nya. Eun saec' un' sum' kah peue yawng a, daecti Eun hkuin' cang mo' ri pun. ²⁵ A kue' beun' ti peue, seuca' rai na' a lec kon' beun' ka na' eun. Yam mhawng' ka lawng Eun Yesu' na', ka keulawn' ing' nghup' ri mae' cung Eun na'. ²⁶ Beun' awn' ka meuh peue Helasa'. Ka keut' nang veng Su'ri'hpe'ni'si' na'. Ka ing' hk'o' hk'ang Yesu' Eun ra ri tec seuca' rai na' lih hk'ai' kon' beun' ri na' eun.

²⁷ Yesu' Eun lah' a ri ka, "Htuk' ri tuil' kon' nyom na' ce som' ri sak' nanggal'. Un' htuk' ri tuil' so' na' hk'a ku' hk'a ce kon' nyom na'."

* **7:24** 7:24 Nang htawm Seunga' na' ngon', a tem' ri lah' veng Tai'ra' mae' veng Si'don na'.

²⁸ Beun' na' ka lah', "Cawo', meuh ka yeut. Daecti saec' meuh so' ut' hk'a'ruim hpuin' na', a pun ri hk'a ku' hk'a lheu' ce kon' nyom na'."

²⁹ Hawc' ko', Yesu' Eun lah' a ri ka, "Ing' reu'. Kopti meuh a ku' top' pa' na', seuca' na' a lih hk'ai' kon' beun' pa' na' eun hawc'."

³⁰ Beun' awn' ka ku ing' ti nya ri. Ka ing' pun ri nyu kon' beun' ri na' it' eun nang hk'eung it' na'. Seuca' na' a pucti heul' hk'ai' heun hawc'.

Yesu' bai' Eun peue lhuit' un' cang leukah' meulamlam ri

³¹ Hawc' ko', Yesu' Eun pucti heul' hk'ai' veng Tai'ra' na' Eun hpa' veng Si'don na' heul'. Eun heul' keunam ka glu Galilae' na' Eun rot nang kuing' Dekapo'lis' na'. ³² Mawn' na', peue va peue lhuit' un' cang leukah' meulamlam ri ti peue ing' ri Yesu' Eun. Ce hk'o' Yesu' Eun tang' ti' ri hk'a' pang eun.

³³ Hawc' Yesu' va Eun peue awn' eun pucti heul' hk'ai' peue cum heun' na' ce na', Eun cuk' yhuk' eun na' ri geun' ti' ri na'. Hawc' ko', eun htueng' ri paic' dak' eun na'. ³⁴ Eun mung' mao' na', Eun seuluit ri ghuih' hpum' ri. Eun lah' a ri heun, "E'fahta'" (vangdoh' ka na' a lah', "Dah' reu'.")

³⁵ Yam awn' na, lhuit' eun peue awn' a cuin, dak' eun na' a ku keuceum. Eun tang' ri cang leukah' meulamlam ri.

³⁶ Yesu' Eun tuil' leukah' un' kah ce ris lawng aen' na ri peue saec' ti peue. Daecti na' Eun ham' ce a'neng, ce gawm ris lawng aen' na heul' hk'awp'. ³⁷ Peue cum heun' na' ce am' nyawk'. Ce lah', "Yeuh Eun ku' chak' na' palkoe. Saec' meuh peue lhuit' na', Eun yeuh eun cang mhawng'. Peue un' cang leukah' na', Eun ku yeuh eun cang leukah'."

8

Yesu' tuil' Eun peue hpawn'heng' ce hk'asom'

¹ Yam awn' na, peue cum heun' seubu ti cum na' ce ing' cu ri. Kopti un' kue' ce ku' hk'a na', Yesu' Eun klawng tapae' ri na' ce ing' ri ti. Eun lah', ² "Tukyak Ui' ri peue aen' ce, ut' ce mae' Ui' pun a loe' seunyi hawc'. Ce hkuin' kue' ku' hk'a. ³ Ui' kaw kah ce ing' yam kaw'n' buih sum' som' ce na' ko', ce ku na' cang kluit' hot' lang' hk'a' ri ing', kopti ngon' ing' ce neum vang seungai na'."

⁴ Tapae' Eun na' ce lah', "Vang seungai htan' awn' na, e' ci' kaw pe sok ri tuil' hkawomun' hk'o' ce hk'a tawngnhaw'?"

⁵ Yesu' Eun mhaing' ce, "Pe' ci' kue' hkawomun' a'neng meul'?"

Ce top', "Kue' e' hkawomun' a' res meul'."

⁶ Eun kah peue cum heun' na' ce mok' pang keute' na'. Hawc' ti Eun hkawomun' a' res meul' na' Eun mun' keuting ri Peucawo' Eun na', Eun ves ri tuil' a ri tapae' ri na' ce. Eun kah ce gvah ri tuil' a ri peue cum heun' na' ce. ⁷ Ce ku kue' ka' aet' lal' loe' tu'. Pun ka' na', Eun ku mun' keuting ri Peucawo' Eun. Hawc' ko', Eun kah ta' pae' na' ce eo' gvah a yeut. ⁸ Peue cum heun' na' ce pun ri hk'a ri sak'. Hawc' ko', tapae' na' ce eo' ri seut' ku' hk'a lheu' na' a pun a' res teng' nuk. ⁹ Me na' ce kue' hpawn' heng' peue. Hawc' kah Eun ce ing' na', ¹⁰ Eun ku lec reu na' mae' tapae' ri na' ce. Ce heul' nang veng Dalmanuhta na'.

Peue Hparisae' hk'o' ce het' keuting

¹¹ Peue Hparisae' na' ing' htu' hting' ce Yesu' Eun. Punta kaw ce long ri nawk Eun na', ce hk'o' Eun yeuh het' keuting lih neum kuing' pang mao' na'. ¹² Eun seuluit ri ghuih' hpum' ri. Eun lah', "A ci' meuh kop keunhaw', peue sa' hkat' maet' maen' na' pe' vae' hk'o' ri nawk het' ku' hk'o' am'? Kaw Ui' lah' a ri pe' neumneum, peue sa' hkat' maet' maen' na' ce kaw un' pun ri nyu het' keuting na' saec'

ti ceu.” ¹³ Hawc' ko', Yesu' Eun pucti heul' hk'ai' ce. Eun lec reu na' heul' hk'a'teh' ka leuum' na'.

Paeng ce peue Hparisae' mae' cawo' Herot'

¹⁴ Tapae' na' pil ce kaw ri pin' hkawomun' heul'. Hk'a'naee reu na' a kue' yawo hkawomun' ti meul'. ¹⁵ Yesu' Eun tuil' sati ce. Eun lah', “Uin' sati ri ri paeng ce peue Hparisae' mae' cawo' Herot' na' reu.”

¹⁶ Kop awn' na, ce lah' a ri puri, “Kopti un' kue' e' hkawomun' na', Eun lah' a yeuh keutit'.”

¹⁷ Kopti Yesu' yawng Eun ku' lah' ce na', Eun lah' a ri ce, “A ci' meuh kop keunhaw', pe' vae' lah' puri mhawng' lawng un' pin' ri hkawomun'? Un' nang nyu, un' nang ceng' pe' aw? Hpum' pe' na' cen' ka aw? ¹⁸⁻¹⁹ Pe' saec' kue' ngai', daecti un' nyu pe' aw? Pe' saec' kue' yhuk', daecti un' mhawng' pe' aw? Yam ves Ui' ri tuil' hkawomun' hpawn' meul' na' ri peue hpawn'heng' peue na' ce na', pe' ci' tang seut' ri pun ku' lheu' ka na' a'neng teng' na', un' pawn pe' a aw?”

Ce top' a, “Kul'leual' teng'.”

²⁰ Eun mhaing' ce, “Yam ves Ui' ri tuil' hkawomun' a' res meul' na' ri peue hpawn'heng' peue na' ce, pe' ci' tang seut' ri pun a a'neng teng'?”

Ce top' a, “A' res teng'.”

²¹ Eun lah' a ri ce, “Un' nang ceng' pe' aw?”

Yesu' bai' Eun peue ngai' lec' nang veng Bet'sai'da'

²² Yam ing' rot ce nang veng Betsai'da' na', peue va peue ngai' lec' ti peue ce ing' hk'o' Yesu' Eun paic' eun. ²³ Yesu' Eun teuk' ti' eun peue ngai' lec' na', Eun va eun heul' hk'a'nok yung' na'. Eun htueng' ri nang ngai' eun na'. Hawc' ko', Eun tang' ti' ri hk'a'pang eun. Eun mhaing' eun, “Mi ci' nyu keunhaw'?”

²⁴ Eun keue'. Eun lah', "Nyu ui' peue na' seun' ce kleum' hku' ko', ce heul'heul' ing'ing'."

²⁵ Yesu' Eun tang paic' ngai' eun na' bae ti pok. Hawc' ko', ngai' eun na' a ku blas'. Sai' ngai' eun na' a chak', a cang nyu ku ceu na' meulamlam ri. ²⁶ Yesu' Eun kah eun ing' ti nya. Eun tuil' leukah' ri heun, "Pawlaee ing' nang yung' na'."

Petru' rap eun ri ti Yesu' meuh Eun Hkrit

²⁷ Yesu' Eun mae' tapae' Eun na' heul' ce nang yung' kue' hk'a'nae kuing' Kae'sari' Hpi'li'pi' na'. Yam long ce hk'a' heul' na', Eun mhaing' tapae' ri na' ce, "Peue ci' lah' Ui' meuh a'nhaw'?" ²⁸ Ce top' a, "Ngon' lah' peue Mi meuh Yo'han cawo' tuil' hk'a' cum' na' eun, ngon' peue lah' Mi meuh E'li'ya eun, ngon' peue lah' Mi meuh peue suip leukah' Eun Peucawo' ti ri peue na' eun."

²⁹ Yesu' Eun mhaing' ce, "Pe' ri sae, pe' ci' lah' Ui' meuh a'nhaw'?"

Petru' eun top' a, "Meuh Mi Hkrit."

³⁰ Yesu' Eun tuil' leukah' un' kah ce lah' peue mhawng' a saec' ti peue.

Yesu' ris Eun ce mhawng' lawng kaw ri pun ri yeum

³¹ Hawc' awn' na, Eun tang sangsawn' tapae' ri na' ce, "Kon' ai' peue na' kaw Eun pun ri hkam' ku' tukhka na' heun' ceu. Nang kawt, ro' peue jhawp' rit mae' peue guil leukah' ritroe na' ce kaw un' rap ri ti Eun. Eun kaw pun ri hkam' toh peue ri. Na' a rot loe' seunyi ko', Eun na' tang kuh' im'." ³² Eun ris lawng aen' a glih'gleueng'. Hawc' ko', Petru' eun yat Yesu' Eun heul' hk'a' ti plak' na', eun is' Yesu' Eun.

³³ Daecti yam Yesu' hpawt' Eun ri keue' ri tapae' ri na' ce na', Eun is' Petru' eun, "Satan, hton' mi ing' hk'a'kui' reu'.

Hpaw mi cá kuit seun' ku' kuit Eun Peucawo' ná, daecti kuit mi seun' peue ko'."

³⁴ Hawc' ko', Eun klawng peue cum heun' ná maeé tapae' ná ce ing' ri ti. Eun lah', "A'nhaw' lawn sum' hot' Ui' ko', eun kaw pun ri tec alo ri, klawm' kleum' rawng'tawp' ri, hawc' ko' hot' Ui' heul'. ³⁵ Kopti a'nhaw' lawn sum' áyu pon ko', eun kaw pun ri sum' áyu ri ná. Daecti a'nhaw' lawn sum' áyu ri pun Ui' maeé leukah' mun' ren'kawn ná ko', eun kaw pun áyu pon. ³⁶ Kopti saec' meuh a'nhaw', eun saec' ná pun ku' kue' pang bhen' keute' ná meuh is' ti gawm'euc' ka, daecti eun lawn sum' áyu ri ná ko', a cí kaw kue' mun' keunhaw' pun eun? ³⁷ A'ko', a'nhaw' cí kaw cang ti keunhaw' a leuploh' áyu ri ná? ³⁸ Peue ut' hk'a'naee sa'hkat' lheu' ri map' maeé sa'hkat' seungai Peucawo' Eun ná pe', a'nhaw' lawn kaic ri Ui' maeé leukah' Ui' ná ko', yam Kon' ai' peue ná lih Eun maeé munhpung' Eun A'kuiing' ná maeé munhpung' ce in'hpom seunga' chak' ná, Eun kaw kaic ri peue awn' eun yeut."

9

¹ Hawc' ko', Eun lah' a ri ce, "Kaw Ui' lah' a ri pe' neumneum, peue cawng maen' ná ce ngon' nanggal' yam un' nang yeum ce ná, ce kaw pun ri nyu kuing' Eun Peucawo' ná lih a maeé tí'ca ri."

Yesu' plin' Eun ruprang ri

² Hawc' ka les seunyi ná, Yesu' Eun va Petru', Yakop' maeé Yo'han ce huk' pang gong lhung' vang cang ut' koe ce ri ka ná. Yam awn' na, ruprang Eun ná a plin' ri nanggal' ce ná. ³ Hk'eung Eun ná a paing hk'aes' yhupyhap. Peue bhen' keute' ná peue a'nhaw' hkuin' kaw cang sak a paing seun' awn' a pun. ⁴ E'li'ya eun maeé Mo'se eun ka ku pucti nanggal' ce ná, ka u Yesu' Eun.

⁵ Petru' eun lah' a ri Yesu' Eun, "Seura', ut' e' maen' na' chak' ka. Pawh, e' na' pleng' tup' loe' lhang', pun Mi ti lhang', pun Mo'se ti lhang', pun E'li'ya ti lhang'." ⁶ (Kopti lhat' nyawk' ce na', eun hkuin' laee yawng kaw ri lah' keunhaw'.)

⁷ Hawc' ko', putum' na' a lih ghuim' ce. A kue' seng' laws' lih neum putum' na', "Peue aen' meuh Eun Kon' ai' leumeus' Ui'. Leuceng ri ti leukah' Eun na' reu'."

⁸ Na' ce keulawn' keue' rop ri ko', ce hkuin' laee nyu peue seubu saec' ti peue, ce nyu yawo Yesu' Eun koe.

⁹ Yam buih lih ce neum pang gong na', Yesu' Eun tuil' leukah' ri ce. Eun un' kah ce ris peue mhawng' lawng ku' pun ce ri nyu na' ri peue saec' ti peue rot ti yam Kon' ai' peue na' tang kuh' im' Eun hk'ai' vang yeum ri na'.

¹⁰ Ce uin' lawng aen' na hk'anae hpum' ri na'. Ce mhaing' puri ri vangdoh' ka lawng "tang kuh' im' hk'ai' vang yeum" na'. ¹¹ Ce mhaing' Eun, "A ci' meuh kop keunhaw' peue guil leukah' ritroe na' ce vae' lah' E'li'ya eun kaw kah ri lih nanggal'?"

¹² Yesu' Eun top' a, "Meuh ka neum, E'li'ya lih eun nanggal' neum. Eun lih mhe' ri pleng' ku ceu na' gawm'euc' ka. Yeuh keutit' ko', a ci' meuh kop keunhaw' a vae' tem' ri uin' ri Kon' ai' peue na' kaw Eun kah ri hkam' ku' tukhka nyawk' mae' hk'a' tecla na'? ¹³ Daecti kaw Ui' lah' a ri pe', E'li'ya lih eun hawc'. Peue awn' yeuh ce ku' sum' yeuh ri na' ri heun hawc' seun' kue' ka lawng eun na' a tem' ri uin' ri na'."

Yesu' bai' Eun kon' nyom me seuca' rai a lec eun

¹⁴ Yam ing' rot ce ri tapae' seubu na' ce na', ce pun ri nyu peue cum heun' na' rop ce tapae' na' ce. Peue guil leukah' ritroe na' ce buih htu'hting' ce. ¹⁵ Yam peue cum heun' na' keulawn' pun ce ri nyu Yesu' Eun gawm'euc' ri na', ce am' nyawk'. Ce hk'uih heul' rap Eun.

¹⁶ Yesu' Eun mhaing' ce, "Pe' ci' buih htu'hting' puri lawng keunhaw'?"

¹⁷ Hk'a'naee ce peue cum heun' na' ku' ti peue na' eun top' a, "Seura', va uí kon' me ri na' eun ing' ri Mi. Seuca' na' a lec eun, a yeuh eun un' cang leukah'. ¹⁸ A saec' meuh yamnhaw' yam seuca' na' lec ka eun na', a yeuh eun tawngtawt pang bhen' keute' na', bai na' a ru' ri lih hk'ai' moeng eun na', eun cet rang' ri, tu' eun na' a kawl'. Hk'o' uí tapae' Mi na' ce ra ri tec seuca' awn' a yeut, daecti ce yeuh un' pun a."

¹⁹ Yesu' Eun top' a, "Ah', peue un' kue' hk'a' yum' cu aen' pe', Uí ci' kaw'n' kaw ut' ling' mae'e' pe' a'neng? Uí ci' kaw'n' kaw yeun' hkam pun pe' a'neng? Va kon' nyom na' eun ing' ri Uí reu'."

²⁰ Ce ku va kon' nyom na' eun ing'. Yam seuca' na' pun a ri nyu Yesu' Eun na', a keulawn' yeuh kon' nyom na' eun raws' ri tawngtawt bhawl' bhael' ri pang bhen' keute' na'. Bai na' a ru' ri lih hk'ai' moeng eun na'.

²¹ Yesu' Eun mhaing' kuiing' eun kon' nyom na' eun, "Yeuh eun ki' na', a ci' ling' a'neng hawc'?" Eun top' a, "Meuh a tang' neum yam kaw'n' aet' eun na'. ²² Punta kaw a toh eun, hk'a'naee ngawl un' lah' hk'a'naee leuum' un' lah' a keucu yeuh eun hk'ui'c' hk'a'naee ka. Daecti Mi lawn kaw cang teum'kawm ye ko', hk'o' Mi tuckyak teum'kawm ye."

²³ Yesu' Eun lah', "A ci' meuh kop keunhaw', mi vae' lah', 'Mi lawn kaw cang teum' ye ko'?' Cang Uí yeut. Pun peue yum' na' ce, ku ceu gawm'euc' na' cang meuh ka yeut."

²⁴ Kuiing' eun kon' nyom na' eun keulawn' klawng ri lah', "Yum' uí yeut. Vang yum' uí un' nuk ka na', hk'o' Mi teum'kawm uí yeuh uí yum' a nuk."

²⁵ Yam Yesu' nyu eun peue cum heun' na' cu ce ri ing' na', Eun is' seuca' rai na', "Seuca' un' cang leukah' lhuít' aen' mi, kaw Ui' tuil' leukah' ri mi pucti heul' hk'ai' heun reu', pawlaee ing' lec hk'a'naee eun na' bae." ²⁶ Seuca' na' a ta'ul' laws'. A yeuh kon' nyom na' eun raws' ri keuyuing' nyawk'. Hawc' ko', a pucti heul'. Kon' nyom na' eun un' laee cheun' ri seun' peue yeum. A hk'o' peue heun' na' ce lah', "Yeum eun hawc'."

²⁷ Daecti Yesu' Eun jhawp' tí eun na', Eun teuk' kon' nyom na' eun kuh' cawng. ²⁸ Hawc' Yesu' ing' lec Eun nang nya na', tapae' Eun na' ce jom ri mhaing' Eun, "A cí meuh kop keunhaw' ye vae' un' cang ra ri tec seuca' awn' a pun?"

²⁹ Yesu' Eun top' a, "Seuca' yeuhki' na' cang ra ri tec a kopti hk'o' mun' na' palkoe."

Yesu' tang ris Eun lawng kaw ri pun ri yeum

³⁰ Yesu' Eun mae' tapae' Eun na' ce pucti heul' neum mawn' na', ce hpa' kuing' Galilae' na' heul'. Yesu' Eun hkuin' sum' kah a'nhaw' yawng vang ut' ce na', ³¹ kopti buih sangsawn' Eun tapae' ri na' ce. Eun lah' a ri ce, "Kon' ai' peue na' kaw Eun pun ri hkam' hk'a' fuin ap peue ri nang tí peue. Peue na' toh Eun. Hawc' ka loe' seunyi na', Eun na' tang kuh' im." ³² Daecti ce saec' un' ceng' ri vangdoh' ka ku' sum' lah' Eun na', ce kaw mhaing' Eun ce lhat'.

A'nhaw' cí' keuting hk'ai' peue

³³ Ce ing' rot nang veng Kapeni'um na'. Yam ut' Eun nang nya na', Eun mhaing' ce, "Pe' cí' htu'hting' puri kop keunhaw' lang' hk'a' na'?" ³⁴ Daecti ce dit' ti, kopti lang' hk'a' na' htu'hting' ce puri kop lawng a'nhaw' cí' keuting hk'ai' peue na'.

³⁵ Hawc' mok' Eun na', Eun klawng tapae' kul'leual' peue na' ce. Eun lah', "A'nhaw' lawn sum' meuh peue nambat keuhti ko', eun kaw pun ri meuh peue tisut', pun ri meuh mhai' peue gawm'euc'."

³⁶ Eun ti kon' nyom aet' ti peue uin' eun cawng nang ngon' ce na'. Hawc' cem Eun kon' nyom na' eun Eun lah' a ri ce, ³⁷ "A'nhaw' lawn rap ri ti kon' nyom seun' aen' eun hk'a'naee muis Ui' na' ko', eun ku rap ri ti Ui' yeut. A'nhaw' lawn rap ri ti Ui' ko', eun hkuin' rap ri ti Ui' koe, daecti eun ku rap ri ti Cawo' ku' cus' Ui' lih na' Eun yeut."

Peue un' to'tam' Ui' na' meuh ce peue ut' hk'a' Ui'

³⁸ Yo'han eun lah', "Seura', nyu ye peue ti peue eun cu muis Mi na' eun ra ri tec seuca' na', kopti un' ut' eun hk'a'naee cum e' na', ye ham' eun."

³⁹ Yesu' Eun lah', "Pawlaee ham' eun. A'nhaw' lawn cu muis Ui' na' yeuh ku' hk'o'am' ko', ti yam yawo eun na' lah' lawng ku' un' chak' to' ri ri Ui' na' a hkuin' kue' saec' ti peue. ⁴⁰ Kopti a'nhaw' lawn un' to'tam' Ui' ko', meuh eun peue ut' hk'a' Ui'. ⁴¹ Kaw Ui' lah' a ri pe' neumneum, saec' meuh a'nhaw' eun lawn tuil' pe' nyui leum' ti kaw' hk'a'naee muis Ui' na' kopti meuh pe' peue Eun Hkrit na' ko', lapsawng' eun na' a kaw un' rai' neum.

Ku' yeuh peue yeuh map'

⁴² Kon' nyom aet' yum' Ui' ti ri peue na' a'nhaw' lawn yeuh eun yeuh map' na' ko', mawt seumu maw' meul' keuting na' pit ngok eun na' ploee' eun lec nang mha'seumut' na', a na' jaen chak'. ⁴³ Ti' mi na' a lawn yeuh mi yeuh map' na' ko', reng' ri tec a reu'. Mi saec' na' ti' lut' pun ri lec vang a'yu im' na' ko', a na' jaen chak' hk'ai' kue' mi ti' lal' plak' mi pun ri lec nang keutong'nyarok vang ngawl

un' laee cang laic na'. ⁴⁴* ⁴⁵ Cung mi na' a lawn yeuh mi yeuh map' na' ko', reng' ri tec a reu'. Mi saec' na' cung lut' pun ri lec vang a'yu im' na' ko', a na' jaen chak' hk'ai' kue' mi cung lal' plak' mi pun ri lec nang keutong'nyarok na'. ⁴⁶† ⁴⁷ Ngai' mi na' a lawn yeuh mi yeuh map' na' ko', koc ri tec a reu'. Mi saec' na' kue' yawo ngai' ti' plak' pun ri lec vang a'yu im' na' ko', a na' jaen chak' hk'ai' kue' mi ngai' lal' plak' mi pun ri lec nang keutong'nyarok na'. ⁴⁸ Mawn' na',

'Rec ce na' a un' laee cang yeum,

ngawl na' a un' laee cang laic.' ‡

⁴⁹ Peue gawm'euc' peue kaw pun ri rap saic' ri seunga' ri ngawl seun' hkawo' peue cis na'.

⁵⁰ Cis na' meuh a ku' chak', daecti eum' ka na' a lawn cuit' ko', a ci' kaw cang yeuh ri eum' bae yeuh sa'nhaw'? Kah hk'a'nae pe' na' kue' cis, yeuh ri ut' tiduih' cumyen' reu'."

10

Yesu' sangsawn' Eun lawng tec puri

¹ Yesu' Eun pucti neum teh' na', Eun heul' nang kuing' Yu'da. Hawc' ko', Eun tang klong' Yaw'dan na' heul' hk'a'teh'. Peue cum heun' na' ce cu ri ing' ri Heun. Eun ku sangsawn' ce seun' ku' tawn yeuh ri na'.

² Peue Hparisae' na' ce ngon' ce ing' long ri nawk Eun ri leukah' mhaing', "Me tec beun' ri na' kleuc' ka ritroe na' aw?"

* **9:44** 9:44 Nang htawm Seunga' na' ngon', a kue' nambat aet' aen' na. 44 Mawn' na', rec ce na' a un' laee cang yeum, ngawl na' a un' laee cang laic.

† **9:46** 9:46 Nang htawm Seunga' na' ngon', a kue' nambat aet' aen' na. 46 Mawn' na', rec ce na' a un' laee cang yeum, ngawl na' a un' laee cang laic.

‡ **9:48** 9:48 I'saya' 66:24

³ Yesu' Eun top' a, "Mo'se eun ci' tuil' leukah' yeuh sa'nhaw'?"

⁴ Ce lah', "Mo'se tuil' eun ahkvang ka, 'Me na' eun lawn tem' ri tuil' licmat tec puri ko', cang tec eun beun' ri yeut."

⁵ Yesu' Eun lah', "Kopti hpum' cen' pe' na', Mo'se eun lut tem' ri tuil' ritroe aen' na. ⁶ Daecti tang' neum yam bhen' keute' na' hpanpleng' a ri na', Peucawo' hpanpleng' Eun me mae' beun'." ⁷ Kop awn' na, me na' eun kaw gah' hk'ai' makuing' ri ka. Eun heul' kui' ri mae' beun' ri na' eun. ⁸ Ka kaw meuh nham' keune keuhti.† Kop awn' na ka hkuin' kaw lae meuh lal' peue, daecti ka meuh yawo ti peue. ⁹ Kop awn' na, ku' Peucawo' kui' Eun ka meuh tiduih' hawc' na', a'nhaw' pawlae yah ka hk'ai' puri."

¹⁰ Yam tang lec ce hk'a'nae nya na', tapae' Eun na' ce mhaing' Eun ri lawng aen' na. ¹¹ Eun top' a, "A'nhaw' lawn tec beun' ri, hawc' ko' eun ti ri is' beun' seubu ko', eun ku len'cu hk'a'pang beun' ri. ¹² A'nhaw' lawn tec me ri, hawc' ko' eun ti ri is' me seubu ko', eun ku len'cu hk'a'pang me ri yeut."

Yesu' nap Eun mun' ri kon' nyom aet'

¹³ Va peue ri ing' tuil' Yesu' Eun paic' kon' nyom aet' na' ce. Daecti tapae' na' ce is' ce. ¹⁴ Yam Yesu' pun Eun ri nyu a na', a un' htuk' hpum' Eun. Eun lah' a ri ce, "Tae' kon' nyom aet' na' ce ing' ri Ui' reu', pawlae ham' ce. Kopti kuing' Eun Peucawo' na' meuh a kuing' ce peue ku' seun' kon' nyom aet' aen' ce. ¹⁵ Ui' lah' a ri pe' neumneum, a'nhaw' lawn un' rap ri ti kuing' Eun Peucawo' na' seun' kon' nyom aet' na' ce ko', eun hkuin' kaw duing pun ri lec nang kuing' Eun Peucawo' na'." ¹⁶ Hawc' ko', Eun cem kon' nyom aet' na' ce. Eun tang' ti' ri hk'a'pang ce, Eun nap mun' ri ce.

* 10:6 10:6 Yamla 1:27 † 10:8 10:8 Yamla 2:24

Nang nhum' meuneum

¹⁷ Yam Yesu' puc Eun ri long hk'a' na' heul', peue ti peue eun ing' seukluin ri nanggal' Eun na'. Eun mhaing' Eun, "Seura' chak', ui' ci' kaw kah ri yeuh sa'nhaw' ui' na' pun cit' tip a'yu tip cot'cu na'?"

¹⁸ Yesu' Eun top' a, "A ci' meuh kop keunhaw' mi vae' lah' Ui' chak'? A lawn un' meuh yawo Peucawo' Eun ko', a'nhaw' hkuin' chak' saec' ti peue.

¹⁹ Mi ku yawng leukah' ritroe aen' na, 'Pawlaee toh peue, pawlaee len'cu, pawlaee ra, pawlaee hkam' sa'hki' un' kue' un' meuh, pawlaee chi'lai ri ti is' peue, hkopyawm' yumyam' ri makuiing' mi ka.' "†

²⁰ Eun lah', "Seura', aen' ce gawm'euc' leuceng ri hot' ui' ri yeuh a tang' neum yam kawn' aet' ui' na' hawc'."

²¹ Yesu' Eun keue' ri heun. Eun leumeus' eun. Eun lah', "Kawn' cut mi ti ceu. Heul' paing' ku' kue' mi na' gawm'euc' ka gvah ri tuil' peue hk'o'tukyak na' ce is' a reu'. Mi kaw kue' sin' ngos heun' nang kuing' pang mao' na'. Hawc' ko', mi na' ing' hot' Ui' reu'."

²² Yam pun eun ri mhawng' leukah' aen' a na', eun kuit nyhap' mhong'mhil' ing' kopti meuh eun peue meuneum nyawk' na'.

²³ Hawc' Yesu' keue' Eun rop na', Eun lah' a ri tapae' ri na' ce, "Peue meuneum na' kaw ce lec nang kuing' Eun Peucawo' na' a nyhap' nyawk'."

²⁴ Tapae' na' ce am' ri ku' sangsawn' Eun na'. Daecti Yesu' Eun tang lah', "Kon', kaw lec nang kuing' Eun Peucawo' na' nyhap' nyawk' ka. ²⁵ Kalaok' ti tu' na' kaw a lec muis peunye na' kawn' sam'ran a hk'ai' peue meuneum na' kaw eun lec nang kuing' Eun Peucawo' na'."

† 10:19 10:19 Pucti heul' 20:12-16; Sawn' leukah' mun' 5:16-20

²⁶ Tapae' na' ce jaen gawm am' nyawk'. Ce lah' a ri puri, "Yeuh keutit' ko', a'nhaw' ci' kaw cang pun hk'a' htut lawtpon na'?"

²⁷ Yesu' Eun keue' ri ce. Eun lah', "Pun peue na', aen' hpaw a ca' cang meuh. Daecti pun Peucawo' Eun na', cang meuh a ku ceu ka."

²⁸ Petru' eun lah', "Tec ye ku ceu gawm'euc' na', ye hot' Mi."

²⁹ Yesu' Eun top' a, "Kaw Ui' lah' a ri pe' neumneum, a'nhaw' lawn tecla nya ri, a'ko' ec'awng' ri, a'ko' makuiing' ri, a'ko' kon'hk'i ri, a'ko' mal' na ri na' kopti pun Ui' mae' leukah' mun' ren'kawn na' ko', ³⁰ hk'a'nae cu cat aen' na eun kaw pun nammaet ka tipak' pun (nya, ec'awng', ma, kon'hk'i, na mal' mae' gawm' ku' tukhka.) Cu hk'a' cat na' eun na' eun kaw pun cit' tip a'yu tip cot'cu ri. ³¹ Daecti peue ut' nanggal' heun' peue na' kaw ce meuh peue ut' hk'a' to'. Peue ut' hk'a' to' heun' peue na' kaw ce meuh peue ut' nanggal'."

Yesu' tang lah' Eun lawng kaw ri pun ri yeum na' bae

³² Yam buih huk' ce nang veng Yeru'salaem na', Yesu' Eun heul' nanggal'. Tapae' na' ce am', saec' meuh peue hot' ce heul' na' ce lhat'. Eun va tapae' kul'leual' peue na' ce heul' kuit' keunam ka hk'a' na'. Hawc' ko', Eun ris ce mhawng' lawng ku' kaw meuh ri Heun na'. ³³ Eun lah', "Buih huk' e' nang veng Yeru'salaem. Kon' ai' peue na' kaw Eun pun ri hkam' hk'a' fuin ap peue ri nang dak ti' ce ro' peue jhawp' rit na' mae' peue guil leukah' ritroe na' ce. Ce kaw taws' a' mu tut yeum ri Heun. Hawc' ko', ce kaw ap Eun ri peue un' meuh peue ceu Yu'da na'.

³⁴ Peue awn' ce kaw lah' ku' pleh ku' jaing, htueng', ta'faet' Eun. Hawc' ko', ce kaw toh Eun. Hawc' ka na' loe' seunyi na', Eun na' tang kuh' im'."

Ku' hk'o' ka Yakop' mae' Yo'han

³⁵ Yam awn' na, Yakop' mae' Yo'han ku' meuh kon' me eun Yebedae' na' ka ing' lah' a ri Yesu' Eun, "Seura', seun' ku' hk'o' ya ti ri ceu na' sum' kah ya Mi yeuh a."

³⁶ Eun lah', "Pa' ci' sum' kah Ui' yeuh keunhaw' pun pa'?"

³⁷ Ka lah', "Yam pun Mi munhpung' ri na', hk'o' Mi tuil' ya mok' hk'a' a'tawm' Mi ti peue hk'a' a've' Mi ti peue awh."

³⁸ Yesu' Eun lah', "Hpaw pa' ca' yawng buih hk'o' ri keunhaw'. Kawk' nyui Ui' na', lak' kaw pa' cang nyui a aw? Hk'a' cum' rap Ui' na', lak' kaw pa' cang rap a aw?"

³⁹ Ka top' a, "Kaw ya cang hkam' a pun yeut." Yesu' Eun lah', "Kawk' nyui Ui' na' kaw pa' pun ri nyui a, hk'a' cum' rap Ui' ri ti na' pa' ku kaw pun ri rap ri ti a. ⁴⁰ Daecti ku' kaw tuil' pa' mok' hk'a' a'tawm' hk'a' a've' Ui' na', a hkuin' meuh Ui' ri. Daecti vang mok' awn' a meuh a is' ce peue ku' Peucawo' rangraen Eun ri uin' pun ce na'."

⁴¹ Yam tapae' seubu kul' peue na' mhawng' ce lawng aen' a na', ce seungeueng' ri Yakop' mae' Yo'han ka.

⁴² Yesu' Eun klawng tapae' na' ce ing' cu ri tiduih'. Eun lah', "Peue pun an'nya meuh cawo' u'peung ce peue un' meuh peue ceu Yu'da na' meuh eun cawo' hk'a' pang ce, cawo' hk'a' ruim eun na' ce ku meuh cawo' hk'a' pang ce yeut, pe' ku yawng a. ⁴³ Daecti pun pe' ri na' a hkuin' yeuh keutit'. A lak' meuh ri is' ti hk'a'. A'nhaw' lawn sum' meuh peue keuting ri pe' ko', eun kaw pun ri yeuh mhai' pe'.

⁴⁴ A'nhaw' lawn sum' meuh peue nambat keuhti ko', eun kaw pun ri meuh mhai' ri peue gawm'euc'. ⁴⁵ Kopti Kon' ai' peue na' hpaw Eun ca' lih pun kaw peue yeuh mhai' Eun, daecti lih Eun pun kaw Eun yeuh mhai' peue mae' kaw Eun tuil' a'yu ri na' meuh ngos ka hk'a' htut lawtpon pun peue heun' na' peue."

Peue ngai' lec' muis Batimeas' tang nyu eun hk'a' ri

⁴⁶ Hawc' awn' na, Yesu' Eun maeé tapae' Eun na' ce ing' rot nang veng Yeri'hko' tiduih' maeé' peue cum heun' na' ce. Yam puc ce ri heul' hk'ai' veng na', Peue ngai' lec' muis Batimeas' meuh kon' eun Timeas' na' eun mok' ri hk'o' keunam hk'a' na'.

⁴⁷ Yam pun eun ri mhawng' Yesu' peue veng Nasaraet' ing' Eun na', eun klawng ri lah', "Yesu' Kon' ai' Davit', hk'o' Mi tukyak ri ui'."

⁴⁸ Peue heun' na' ce saec' is' eun, kah eun dit'ti. Daecti eun gawm klawng ri lah' laws' a, "Kon' ai' Davit', hk'o' Mi tukyak ri ui'." ⁴⁹ Yesu' Eun kuit'. Eun tuil' leukah' lah', "Klawng eun ing' maen' reu'." Peue heun' na' ce klawng ri lah' a ri peue ngai' lec' na' eun, "Ren'kawn reu', kuh' vae, buih klawng Eun mi'."

⁵⁰ Peue ngai' lec' na' eun hpuic' ri tec hk'o dal' ri na'. Hawc' ko', eun seuvuin ri kuh' ing' ri Yesu' Eun.

⁵¹ Yesu' Eun mhaing' eun, "Mi ci' sum' kah Ui' yeuh keunhaw' ri ti?"

Peue ngai' lec' na' eun top' a, "Seura', sum' nyu ui' hk'a' ri."

⁵² Yesu' Eun lah', "Heul' reu', hk'a' yum' mi na' yeuh a mi cuin hawc'." Eun keulawn' nyu hk'a' ri. Eun hot' Yesu' Eun hot' hk'a' na' heul'.

11

Cawo' pe lec Eun veng Yeru'salaem

¹ Yam Yesu' Eun maeé' tapae' Eun na' huk' rot ce keunam veng Yeru'salaem nang yung' Bethpage' maeé' yung' Betani' pang gong Sanlon na', Eun cus' tapae' lal' peue na' ka heul'. ² Eun lah' a ri ka, "Heul' ri yung' ut' nanggal' teh' a reu'. Yam heul' lec' pa' yung' teh' a na', pa' kaw pun ri nyu rawngla aet' a'nhaw' un' nang duing pawk a na' mawt a ri teh'. Pa' na' kah' ri teuk' a heul' maen'. ³ Peue ti ri peue eun lawn na' lhon' ri mhaing' pa', 'A ci'

yeuh keunhaw' pa' vae' yeuh ku' yeuhki'?' pa' na' lah',
'Cawo' lo' Eun a. Ti yam na' ya tang ing' tuil' a maen'.' ”

⁴ Yam heul' ka na', ka nyu rawngla aet' na' mawt a ri ri hk'a'nok ka leuva' ru mae' hk'a' na'. Yam buih kah' ka a na', ⁵ peue cawng mawn' na' ce ngon' ce lah', "A ci' yeuh keunhaw', pa' vae' kah' mu' ka rawngla aet' awn' na?" ⁶ Ka ku lah' a seun' ku' Yesu' tuil' Eun leukah' ri ka na'. Ce ku kah' ka teuk' a heul'. ⁷ Ka teuk' rawngla aet' na' ing' ri Yesu' Eun. Hawc' ce lhup' hk'o dal' ri na' pang kui' ka na', Yesu' Eun pawk a. ⁸ Peue heun' na' ce ti ri tawm hk'o ri na' nang gon' hk'a' na'. Ngon' ce taws' yuim na', ce tawm a nang gon' hk'a' na'. ⁹ Peue cum heun' heul' nanggal' mae' peue heul' hk'a' kui' Eun na' ce klawng ri lah',
"Hosana,*

nap mun' ri Cawo' ing' hk'a' ruim muis Eun Peucawo' na'
Eun.†

¹⁰ Nap mun' ri kuing' eun kuiing' e' Davit' ku' kaw ing' na'
reu'.

Hosana, suk'seun' Peucawo' lhung' hk'ai' peue Eun."

¹¹ Yesu' Eun huk' lec nang veng Yeru'salaem na'. Eun huk' nang nya hk'o' mun' keuting na'. Eun heul' eo' ri nawk ku ceu na' ce. Daecti kop kaw a fec' na', Eun pucti lih hk'ai' mawn' na'. Eun lih nang yung' Betani' mae' tapae' kul'leual' peue na' ce.

Yesu' Jha' Eun kleum' pli' keutuic

¹² Yam ceng' ka yam buih puc ce ri hk'ai' yung' Betani' na', Yesu' Eun sum' som'. ¹³ Eun nyu kleum' pli' keutuic lha' kluim' vang seungai na' ti kleum'. A ci' na' kue' pli'

* **11:9** 11:9 Hosana na' meuh a leukah' Hebrae', vangdoh' ka na' a lah', "Htut ye". † **11:9** 11:9 Suk'seun' 118:25, 26

un' kue', Eun heul' nom' a. Kopti un' meuh a yam pli' ka, yam nyu Eun pal lha' ka a un' kue' pli' na', ¹⁴ Eun lah' a ri kleum' pli' keutuic na', "Tang' neum seunyaen' na', peue hkuin' kaw laee pun ri hk'a pli' mi saec' ti peue." Tapae' Eun na' ce ku mhawng' ku' lah' Eun na' yeut.

Yesu' yeuh Eun nya hk'o' mun' keuting na' seunga'

¹⁵ Yam rot ce nang veng Yeru'salaem na', Yesu' Eun ing' lec' nang kang' hkung' ka nya hk'o' mun' keuting na'. Eun ra ri tec peue paing' hk'eung mae' peue leuvaee hk'eung mawn' na' ce pucti heul'. Eun seukleup' hpuin' ce peue leuploh' leumuil na' mae' pang' mok' ce peue paing' gui' na'. ¹⁶ Eun un' kah a'nhaw' pin' hk'eung ti ri ceu lec' lih kang' hkung' ka nya hk'o' mun' keuting na'. ¹⁷ Eun sangsawn' ce,

“Nya Ui' na' kaw a pun ri lah' ri meuh

nya vang' hk'o' mun' pun peue ceu ku ceu'‡, a tem' ri uin' ri yeuhki', un' meuh ka aw?

Daecti pe' yeuh a meuh 'vang' hk'on'ro con'§.”

¹⁸ Ro' peue jhawp' rit mae' peue guil leukah' ritroe na' pun ce ri mhawng' leukah' awn' a na'. Kop awn' na ce tang' ri sok hk'a' kaw ri toh Eun, kopti lhat' ce ri Heun, kopti peue heun' na' am' ce ri ku' sangsawn' Eun na'.

¹⁹ Yam meuh a hk'a'pul na', Yesu' Eun mae' tapae' Eun na' ce pucti heul' hk'a' nok ka veng na'.

Kleum' pli' keutuic na' yeum hk'oh' ka

²⁰ Yam ceng' ka yam buih long ce hk'a' heul' na', ce nyu kleum' pli' keutuic na' yeum hk'oh' a rot ri res ri na'.

²¹ Petru' eun kuit rot eun lah' a ri Yesu' Eun, “Seura', keue' reu'. Kleum' pli' keutuic jha' Mi na' yeum hk'oh' ka hawc'.”

‡ 11:17 11:17 I'saya' 56:7 § 11:17 11:17 Yerami' 7:11

²² Yesu' Eun top' a, "Yum' Peucawo' Eun reu'. ²³ Kaw Ui' lah' a ri pe' neumneum, a'nhaw' lawn tuil' leukah' ri gong aen' na, 'Sat ri heul' hk'ui'c' lec nang mha'seumut' na' reu', eun lawn un' kangkae hk'a'naee hpum' ri daecti eun na' yum' seun' ku' lah' eun na' kaw a meuh ko', a kaw meuh neum yeut. ²⁴ Kop awn' na kaw Ui' lah' a ri pe', pe' saec' na' hk'o' keunhaw' un' lah', yum' kaw pe' pun a reu'. Hawc' ko', pe' kaw pun a yeut. ²⁵ Yam cawng pe' ri hk'o' mun' na', punta Kuing' pe' Cawo' ut' nang kuing' pang ma' na' kaw Eun plo' map' pe' na', plo' map' ce peue yeuh ku' kleuc' ri pe' na' ce reu'."*

Mhaing' peue lawng Yesu' pun Eun ti'ca

²⁷ Yam tang ing' rot ce nang veng Yeru' salaem na' bae yam Yesu' buih eo' Eun nang kang' hkung' ka nya hk'o' mun' keuting na', ro' peue jhawp' rit, peue guil leukah' ritroe mae' nang kawt na' ce ing' mhaing' Eun,

²⁸ "Mi yeuh ceu nang aen' ce, Mi ci' cu ti'ca keunhaw' yeuh a? A'nhaw' ci' tuil' ti'ca aen' a ri Mi?" ²⁹ Yesu' Eun top' a, "Ui' ku kaw mhaing' pe' ti moeng yeut. Pe' na' lah' Ui' mhawng' a. Hawc' ko', Ui' na' kawn' lah' pe' mhawng' Ui' ci' pun ti'ca aen' a ri a'nhaw' Ui' yeuh ceu nang aen' ce.

³⁰ A'nhaw' ci' tuil' ti'ca tuil' hk'a' cum' na' ri Yo'han eun, neum kuing' pang ma' aw, a'ko' neum peue aw? Lah' Ui' mhawng' a reu'." ³¹ Ce sa'lit puri lah', "E' lawn top' lih a neum kuing' pang ma' ko', Eun kaw tang cang mhaing' e', 'A ci' yeuh keunhaw' pe' vae' un' yum' Yo'han eun?"

³² Daecti e' lawn top' lih a neum peue ko', ..." (Ce lhat' ri peue heun' na' ce, kopti peue gawm'euc' na' yum' ce Yo'han meuh eun peue suip leukah' Eun Peucawo')

* **11:25** 11:25 Nang htawm Seung' na' ngon', a kue' nambat aet' aen' na. **26** Daecti pe' lawn un' plo' map' peue na' ko', saec' meuh Kuing' Cawo' pe' ut' nang kuing' pang ma' na' Eun ku kaw un' plo' map' pe' na' yeut.

neumneum na.) ³³ Kop awn' na, ce top' a ri Heun, "Un' yawng ye a."

Yesu' Eun lah' a ri ce, "Yeuh keutit' ko', Ui' ku hkuin' kaw lah' pe' mhawng' cu Ui' ti' ca keunhaw' Ui' yeuh ceu nang aen' ce yeut."

12

Leukah' leupong' lawng sang' hpa' val pli' bui

¹ Hawc' ko', Eun sangsawn' leukah' leupong' ri peue heun' na' ce. Eun lah', "Peue ti peue sang' eun val pli' bui. Eun ru a rop. Eun kung' a is' keutui' vang bet' pli' bui. Eun pleng' a is' tup' lhung' vang ko'. Hawc' ko', eun tuil' peue sang' val na' ce sang' hpa' a. Hawc' ko', eun heul' nang kuing' tawk seubu. ² Yam rot a yam poc' pli' bui na', punta kaw eun ti pli' ku' kaw eun htuk' ri pun na', eun kah mhai' ri na' eun heul' ri peue sang' hpa' val na' ce. ³ Daecti peue sang' hpa' val na' ce mheut' ri peum' eun, ce ploé' eun ing' neh. ⁴ Eun tang kah mhai' seubu na' eun heul' ri ce bae. Daecti ce ku peum' cing' eun, yeuh ku' hk'o'kleh' ri heun.

⁵ Cawo' val na' eun kah mhai' seubu na' eun heul' ri ce bae ti peue. Ce ku toh eun yeum. Cawo' val na' eun tang kah mhai' seubu heun' peue na' ce heul'. Ngon', ce peum' ce. Ngon', ce toh ce yeum. ⁶ Cawo' val na' eun vang yawo nang kaw heul' ti peue koe. Eun meuh kon' me leumeus' eun na' eun. Eun kah eun heul' pok tisut' ka na' kopti hteum' eun, 'Na' ce chak' ri hkopyawm' ri kon' me ui' na' eun.'

⁷ Daecti peue sang' val na' ce lah' a ri puri, 'Peue aen' meuh eun peue pun sin'. Pawh, e' toh eun. Sin' eun na' a na' meuh is' e'.

⁸ Kop awn' na, ce mheut' ri toh eun. Hawc' ko', ce ol' ri tec eun hk'a'nok ka val na'. ⁹ Kop awn' na, cawo' val na' eun ci' kaw yeuh sa'nhaw' ri ce? Kaw eun tang ing' toh

peue sang' hpa' val awn' ce. Hawc' ko', eun kaw tang tuil' nang seubu ce sang' hpa' val awn' na. ¹⁰ Un' duing lip pe' htawm Seunga' ton aen' a aw?

A lah', 'Seumu peue go' nya na' tec ce hawc' na',
maet' maen' meuh a seumu kleum' ka nya vang a' ye'
keuting hk'ai' seumu seubu na' hawc'.

¹¹ Cawo' Peucawo' yeuh Eun kan' aen' na,
a meuh ku' hk'o'am' ri ngai' e' na'."*

¹² Kopti yawng ce leukah' leupong' awn' lah' a ti ri na',
ce sok hk'a' kaw ri mheut' ri ti Eun. Daecti kopti lhat' ce ri
peue heun' na' ce, ce gah' heul' hk'ai' Heun.

Seue' hkawn' ri cawo' Kae'sa eun

¹³ Hawc' awn' na, punta kaw ce ti leukah' Yesu' lah'
kleuc' Eun na', ce kah peue Hparisae' na' ce mae' peue eun
Herot' na' ce heul' ri Heun ngon'. ¹⁴ Ce ing' lah' a ri Heun,
"Seura', yawng ye meuh Mi peue leupaws seumeu'. Mi
un' meuh mae' hk'a' mawn' hk'a' maen' ri peue. Mi hkuin'
keue' ri buh a'nhaw', daecti Mi sangsawn' a hot' hk'a' Eun
Peucawo' na' neumneum. Seue' ye hkawn' ri cawo' Kae'sa
eun na' cawp' ka aw, un' cawp' ka aw? ¹⁵ Kaw ye htuk' ri
seue' a ri cawo' Kae'sa eun aw, a'ko' un' seue' aw?"

Daecti Yesu' yawng Eun meuh ce peue leukah' seunga'
hpum' vok' na', Eun lah' a ri ce, "A ci' yeuh keunhaw',
pe' vae' sok ku' kleuc' Ui'. Tuil' Ui' nawk paec ti htaep'
reu'." ¹⁶ Ce ku ti ri tuil' htaep' na' ri Heun. Eun mhaing' ce,
"Htaep' na' a ci' kue' rup a'nhaw', muis a'nhaw'?"

Ce top' a, "Meuh a cawo' Kae'sa eun."

¹⁷ Hawc' ko', Yesu' Eun lah' a ri ce, "Hk'eung eun cawo'
Kae'sa na' tuil' a keutah ri cawo' Kae'sa eun. Hk'eung Eun
Peucawo' na' tan a keutah ri Peucawo' Eun reu'."

Ce ku am' nyawk' ri Heun.

* ^{12:11} 12:11 Suk'seun' 118:22, 23

Lawng tang kuh' im'

¹⁸ Peue Sadu'kae' lah' tang kuh' im' a un' kue' na' ngon' ce ing' mhaing' Yesu' Eun, ¹⁹ "Seura', Mo'se tem' eun ri tawm' ri uin' a pun ye yeuhki', 'Peue ti peue eun lawn yeum yam un' nang kue' ri kon' ko', punta kaw eun kue' kon' suip' ceucat ri na', ec' eun a'ko' awng' eun na' eun kaw kah ri tang ti beun' awn' eun.' ²⁰ Kue' a awng'ec' a' res peue. Nang ec' na' eun ti ri is' beun', daecti eun yeum yam un' nang kue' ri kon'. ²¹ Rot ti A'nyi na' eun ti beun' eun nawepi ri na' eun, daecti eun ku yeum yam un' nang kue' ri kon'. Rot ti Aisam' na' eun ku seun' awn' a yeut. ²² Rot ti gawm' a' res peue ce un' tawn ri kue' kon', ce yeum gawm'euc' ri. Vang tisu't' ka na', beun' awn' eun ku yeum. ²³ Yam tang kuh' im' na', beun' awn' eun ci' na' meuh beun' a'nhaw' ri ce, kopti ti ce beun' awn' eun gawm' a' res peue ri na'?"

²⁴ Yesu' Eun top' a, "Kleuc' pe' hawc'. Yeuh pe' ko' na' meuh a kopti un' yawng pe' htawm Seunga' na' mae'e' ti'ca Eun Peucawo' na', un' meuh ka aw? ²⁵ Yam peue yeum na' tang kuh' im' ce na', ti puri mae'e' kui' puri na' a hkuin' kaw lae' kue', kaw ce keut' ri seun' in'hpom kuing' pang mao' na' ce ko'. ²⁶ Ku' to' ri lawng tang kuh' im' tem' ri nang htawm eun Mo'se ku' tem' a lawng bang' kat' na', ku' Peucawo' lah' Eun ri heun, 'Meuh Ui' Peucawo' eun Abraham, Peucawo' eun I'cak' mae'e' Peucawo' eun Yakop'† na', un' duing lip pe' a aw? ²⁷ Un' meuh Eun Peucawo' ce peue yeum na', daecti meuh Eun Peucawo' ce peue a'yu im' na'. Kuit kleuc' pe' nyawk'."

Leukah' ritroe a'ye' keuting hk'ai' peue na'

²⁸ Peue guil leukah' ritroe ti peue na' ing' mhawng' eun htu'hting' ce puri. Eun nyu Yesu' top' Eun a chak' nyawk'.

† 12:26 12:26 Pucti heul' 3:6

Eun ku mhaing' Yesu' Eun, "Hk'a'naee leukah' ritroe na' gawm'euc' ka, nangnhaw' na' a ci' a'ye' keuting hk'ai' ka?"

²⁹ Yesu' Eun top' a, "Leukah' ritroe ku' a'ye' keuting hk'ai' peue na', 'Peue I'sarela' na' pe', leuceng a reu'. Cawo' Peucawo' e' na' meuh Eun Cawo' Peucawo' ti peue koe.‡

³⁰ Leumeus' Cawo' Peucawo' mi na' Eun ri sut' hpum' ri, sut' civit ri, sut' kamkuit ri, sut' kawlr'eng ri na' gawm'euc' ka reu'.§ ³¹ Lal' moeng ti moeng ka na', 'Leumeus' peue ut' keunam caona' mi na' ce seun' leumeus' mi tu' ri na' yeut reu'. Leukah' ritroe ku' keuting hk'ai' leukah' lal' moeng aen' a na' hpaw a ca' laee kue'."*

³² Peue guil leukah' ritroe na' eun lah', "Seura', leukah' Mi na' cawp' ka nyawk'. Lah' Mi Peucawo' Eun meuh Peucawo' ti peue koe, lheu' Heun ri a un' laee kue' nang seubu saec' ti peue na' cawp' ka. ³³ Leumeus' Peucawo' Eun ri sut' hpum' ri, sut' cu'yi ri, sut' kawlr'eng ri na' gawm'euc' ka, leumeus' peue ut' keunam caona' mi na' ce seun' leumeus' mi tu' ri na' yeut ko', kue' ka a'ye' keuting hk'ai' ku' dum ri tan mae' ku' tan na' gawm'euc' ka."

³⁴ Yam Yesu' nyu Eun top' eun a mae' kue' ri cu'yi na', Eun lah' a ri heun, "Hpaw mi ca' laee seungai kuing' Eun Peucawo' na'." Tang' neum yam awn' na, a'nhaw' hkuin' laee hat' ri mhaing' Eun bae saec' ti peue.

Hkrit Eun ci' meuh kon' a'nhaw'?

³⁵ Yam Yesu' buih sangsawn' Eun ce nang kang' hkung' ka nya hk'o' mun' keuting na', Eun mhaing' ce, "Peue guil leukah' ritroe na' lah' ce Hkrit Eun meuh kon' ai' eun Davit' na', a ci' kaw cang meuh yeuh sa'nhaw'? ³⁶ Davit' eun ku lah' a hk'a'naee cu ri Cit' seunga' chak' na' yeuhki', 'Peucawo' lah' Eun a ri Cawo' ui' na' Eun,

‡ 12:29 12:29 Saw'n leukah' mun' 6:4 § 12:30 12:30 Saw'n leukah' mun' 6:5
* 12:31 12:31 Fae' 19:18

“Mok' hk'a' a'tawm' Ui' na'
rot ti uin' Ui' ransu Mi na' ce
hk'a'ruim dak cung Mi na' reu.” †

³⁷ Tu' eun Davit' na' eun ku vae' klawng Eun meuh Cawo',
Eun ci' kaw cang meuh kon' eun Davit' yeuh sa'nhaw?"

Peue cum heun' na' ce ren'kawn leuceng leukah' Eun
na'.

Yesu' is' Eun peue guil leukah' ritroe na' ce

³⁸ Yam Yesu' buih sangsawn' Eun na', Eun lah', "Uin' sati
ri peue guil leukah' ritroe na' ce reu'. Sum' cuip' ce hk'o
dal' eo' ri. Ce sum' kah peue luisa ri nang keulas na'. ³⁹ Ce
sum' mok' ri vang mok' a'ye' keuting hk'ai' peue hk'a'nae
sa'la vang hk'o' mun' na' mae' vang hk'asom' na'. ⁴⁰ Ce
rutrim' ri ti nya ce a'ya seunao na'. Ce yeuh ri hk'o' mun'
ling'lang' sum' kah peue nyu ri. Ce kaw pun ri hkam' hk'a'
ciyang reng na' lheu' peue ri."

A'ya seunao tan paec

⁴¹ Yesu' mok' Eun nanggal' vang tan leumuil ka nya hk'o'
mun' keuting na'. Eun ko' ri nawk peue heun' na' seu' ce
leumuil. Peue meuneum heun' peue na' ce ti leumuil ing'
heun'heun', ce ing' buit ri seu' a.

⁴² Daecti a'ya seunao hk'o'tukyak ti peue na' ka ing'
tan paec seurak' lal' paec, paec lal' paec na' a ngos leng
nyawk'. ⁴³ Yesu' Eun klawng tapae' ri na' ce. Hawc' ko', Eun
lah' a ri ce, "Kaw Ui' lah' a ri pe' neumneum, a'ya seunao
hk'o'tukyak aen' tan ka ri vang tan leumuil ka nya hk'o'
mun' keuting na' heun' hk'ai' peue gawm'euc'. ⁴⁴ Kopti ce
ri, hue' ce a lih vang kue' ri heun' na' ce tan a. Daecti beun'
aen' ka ko', ka saec' hk'o'tukyak, ka ku tan ku' kaw uii' a'yu
ri na' gawm'euc'."

† 12:36 12:36 Suk'seun' 110:1

13

Het'kaw hk'aws' rot yam tisut'

¹ Yam Yesu' puc Eun ri lih neum nya hk'o' mun' keuting na', tapae' ti peue na' eun lah', "Seura', keue' reu'. Seumu aen' ce keuting, nya aen' ce chak' ngam nyawk'."

² Yesu' Eun top' a, "Nyu pe' nya aen' ce keuting nyawk', un' meuh ka aw? Seumu aen' kaw ce un' laee po ri pang puri saec' ti meul'. A kaw pun ri seut' ri tec ri ku meul' ri."

³ Yam Yesu' mok' Eun pang gong Sanlon vang to'tat ka nya hk'o' mun' keuting na', Petru', Yakop', Yo'han mae' Andre ce ing' mhaing' koe Eun, ⁴ "Hk'o' Mi lah' ye mhawng' a, ceu nang tit' ce a ci' kaw keut' meuh yamnhaw'? Punta kaw e' yawng yam awn' kaw a hk'aws' meuh na', a ci' kaw kue' het' keunhaw'?"

⁵ Yesu' Eun lah' a ri ce, "Uin' sati ri reu'. Pawlaee tuil' peue cop' pe'. ⁶ Peue heun' na' kaw ce peus muis Uí' na' ce na' ing' lah', 'Meuh uí' Heun ri.' Ce na' cop' peue heun'heun' na' ce. ⁷ Yam pun pe' ri mhawng' lawng peueng' suik' mae' lawng suik' kaw a keut' na', pawlaee hpum' seuyuk. Kopti lawng aen' kaw a kah ri kue' meuh yeut, daecti a hkuin' kaw nang rot yam tisut' ka. ⁸ Peue ti ceu hawc' ti ceu, kuing' ti kuing' hawc' ti kuing', peue kaw kleuc' puri. A kaw kue' in'san' mae' ut' ngeup' heun' duih'. Ceu nang aen' ce gup kaw'n' kaw a meuh kleum' ka ku' tukhka na' ce.

⁹ Uin' sati ri ko' reu'. Kaw peue mheut' ri ti pe' heul' nang sa'nam' ka veng na'. Peue kaw ta'faet' pe' hk'a'naee sa'la vang hk'o' mun' na'. Meuh a kopti Uí' ri, pe' kaw pun ri va ri heul' nanggal' ce cawo' veng na' mae' hkun'haw'ham' na' ce. Pe' kaw kah ri hkam' sa'hki' na' ri ce. ¹⁰ Leukah' mun' ren'kaw'n' na' kaw a kah ri sangsawn' ri peue ceu gawm'euc' na' ce nanggal'. ¹¹ Saec' meuh yamnhaw' yam mheut' peue pe' huk' vang taws' a'mu na',

pawlaee hki'keung ri ku' kaw pe' lah' na'. Lah' yawo pal ku' tuil' Eun pe' lah' yam awn' a na' reu', kopti hpaw a ca' meuh ku' lah' pe' meun, daecti meuh a ku' lah' ka Cit' seunga' chak' na'.

¹² Awng'ec' na' ce kaw fuin puri rot ti yeuh ce puri yeum, kuiing' na' ce kaw fuin kon' ri, kon' na' ce kaw fuin makuiing' ri na' ce rot ti hk'o' a ce yeum. ¹³ Kopti meuh a Ui' ri, peue gawm'euc' peue kaw nyu pe' pereng ri. Daecti peue yeun' hkam a rot tisut' ka na' kaw ce pun ri lawtpon.*

¹⁴ Yam nyu pe' ku' hk'aw'jeuk yeuh ku' lulaic na'† ut' a vang un' htuk' a ri ut' na', (peue lip htawm aen' a na', co'ca' ri yawng a reu') peue ut' nang kuing' Yu'da na' kah ce hk'uih huk' pang gong na' reu'. ¹⁵ Peue ut' pang a'ras' na' ce pawlaee lih hk'a'col, a'ko' pawlaee lec ri ti hk'eung ti ri ceu pucti lih hk'ai' nya na'. ¹⁶ Saec' meuh peue ut' nang mal' na' ce pawlaee ing' ti hk'o' keuting ri na'.‡ ¹⁷ Sa'hkat' yam awn' na kaw a meuh ku' hk'o'lhat' keuting pun a'ya nyhel' mae' nang kue' kon' pui na' ce. ¹⁸ Ceu nang aen' ce punta kaw a un' keut' kue' yam kawt' na', hk'o' mun' reu'. ¹⁹ Kopti, yam awn' kaw a meuh yam tukhka nyhap' nyawk' ku' keunhaw' un' laee keutec pun a ri mae' ka. Tang' neum yam Peucawo' hpanpleng' Eun bhen' keute' na' rot seunyaen' na', a hkuin' nang duing kue'. Saec' hk'a' nanggal' ka heul' na', a hkuin' kaw laee kue' bae. ²⁰ Cawo' Peucawo' Eun lawn un' yeuh yam awn' na dot' ko', a'nhaw' hkuin' kaw lawtpon a saec' ti peue. Daecti kopti meuh a peue leuk Eun ri ti na' ce, Eun kaw yeuh meuyam awn' a dot'. ²¹ Yam rot a yam awn' na, peue ti ri peue eun lawn lah' a ri pe', 'Keue' reu', Hkrit ut' Eun maen", a'ko' 'Keue' reu', ut' Eun mawn", pe' na' pawlaee leuceng a. ²² Kopti

* **13:13** 13:13 Mahtae 10:22 † **13:14** 13:14 Dayela' 9:27; 11:31; 12:11

‡ **13:16** 13:16 Maku' 2:4

peue guil ri meuh Hkrit Eun maeé' peue guil ri meuh peue suip leukah' Eun Peucawo' na' kaw ce pucti lih. A lawn kaw cang ko', punta kaw ce cop' ri pun peue Peucawo' leuk Eun ri ti na' ce na', ce kaw yeuh het' keuting maeé' ku' hk'o'am' na' ce. ²³ Kop awn' na, uin' sati pé' reu'. Lah' Uí' ri uin' a ri pé' tang' neum cawo ka hawc'.

²⁴ Daecti hk'a'naee meuyam awn' na yam ku' tukhka nyhap' nyawk' awn' hawc' ka na', seunyi na' a na' duim'lawng, a'chi' na' a hkuin' kaw laee ceng'.

²⁵ Seumeueng' na' a na' hk'uic' lih neum pang maó', tí'ca ka maó' na' ku ceu ka a kaw pun ri keuyuih' fuii'fai'.[§]

²⁶ Yam awn' na, peue kaw pun ri nyu Kon' aí' peue lih Eun hk'a'naee putum' na' ri munhpung' tí'ca keuting ri na'. ²⁷ Eun kaw cus' in'hpom ri na' ce heul' hk'on'ro peue leuk Eun ri ti na' ce tang' neum rot ri hkop' lok dal maó' pun' hon' pun' cé' na'.

²⁸ Rin ri ti leukah' leupong' lawng kleum' plí' keutuic na' reu'. Yam gluh' ka na', pé' yawng meun kaw a hk'aws' rot yam kuc'. ²⁹ Seun' awn' na, yam pun pé' ri nyu ceu nang awn' kue' meuh ka na', pé' kaw yawng kaw Eun hk'aws' rot, Eun rot keunam ka leuva' na' hawc'. ³⁰ Kaw Uí' lah' a ri pé' neumneum. Cu yam peue maet'maen' na' un' nang pon ce na', ceu nang aen' ce gawm'euc' a kaw meuh neum. ³¹ Mao' na' maeé' bhen' keute' na' kaw a rai', daecti leukah' Uí' na' a hkuin' kaw rai'.

Seunyi meuyam awn' na a'nhaw' un' yawng a saec' ti peue

³² A'nhaw' hkuin' yawng seunyi meuyam awn' a saec' ti peue. Saec' meuh in'hpom na' ce maeé' Kon' aí' Eun hkuin' yawng a. A'kuiing' yawng Eun a koe. ³³ Uin' sati ri, pawn kui' ri ko' reu'. Yam awn' a kaw rot yamnhaw', pé' hkuin'

§ 13:25 13:25 I'saya' 13:10; 34:4

yawng a. ³⁴ Seun' a peue ti peue puc eun ri heul' kuing' tawk seubu ko'. Eun ap kan' ku' mhai' na' kaw ce htuk' ri yeuh na' ri ce ti peue hawc' ti peue. Eun ku tawm' peue ko' leuva' na' eun ko' a meulamlam ri.

³⁵ Kop awn' na, saec' meuh yamnhaw' ko' a reu', kopti un' yawng pe' yam cawo' nya na' kaw eun tang ing' na', a na' meuh peunpul un' yawng, peunsum' un' yawng, yam el' leuo' un' yawng, a'ko' a na' meuh peunngup cawo un' yawng. ³⁶ Eun lawn htip'rip ri ing' rot ko', pawlae uin' eun ing' nyu it' nyum pe'. ³⁷ Ku' lah' Ui' ri pe' na', lah' Ui' a ri peue gawm'euc' yeut, 'Uin' sati ri ko' reu'.' ”

14

Ro' na' sa'lit ce ri kaw toh Yesu' Eun

¹ Bae lal' seunyi na', kaw a rot yam pawe vel nya mae' yam pawe un' seue' hkawomun' is' paeng na'. Ro' peue jhawp' rit na' ce mae' peue guil leukah' ritroe na' ce hk'a'naee vang hk'a' vok' hk'a' chi'lai na' ce sok hk'a' kaw ri mheut' ri toh Yesu' Eun. ² Ce lah' a ri puri, “Daecti mak' nang yeuh a hk'a'naee yam ka pawe na', peue heun' na' na' peue cang yeuh ku' suksak.”

Beun' yung' Betani' lhuik' lamawn ri Yesu' Eun

³ Yam Yesu' mok' Eun ri som' keunam hpuin' nang nya eun Si' mon ku' meuh peue naw na' eun nang yung' Betani' na', beun' ti peue na' ka pin' lamawn hom' ngos heun' seue' ri nang kong' seumu na' ing'. A pleng' ri neum ku' hom' seungá na'. Ka tuh' hpa' ka na', ka lhuik' a ri cing' Eun Yesu' na'.

⁴ Peue ut' mawn' na' ce a un' htuk' hpum' ce ngon'. Ce lah' a ri puri, “A ci' yeuh keunhaw', ka vae' yeuh lamawn hom' awn' a meuh ku' hk'o' hk'awng'? ⁵ Na' ka paing' lamawn hom' awn' a ka na' pun ngos ka na' a ta

ngos reng na' ti neum. Ka na' htuk' ri gvah ri tuil' a ri peue hk'o'tukyak na' ce." Hawc' ko', ce is' beun' awn' ka nyawk'.

⁶ Daecti Yesu' Eun lah', "Tae' ka reu'. A ci' meuh kop keunhaw' pe' vae' suksak ka? Beun' aen' yeuh ka ku' chak' na' ri Ui' hawc'. ⁷ Peue hk'o'tukyak na' ut' ce mae' pe' laleung. Pe' sum' teum'kawm ce yamnhaw', pe' ku kaw cang teum'kawm ce. Daecti Ui' ri, Ui' hkuin' kaw ut' mae' pe' laleung. ⁸ Beun' aen' yeuh ka seun' ku' yeuh pun ri na' hawc'. Lhuik' ka lamawn hom' ri tu' Ui' aen' a na', meuh a ku' rangraen ri uin' punta yam na' peue puing' tu' Ui' na'. ⁹ Kaw Ui' lah' a ri pe' neumneum, leukah' mun' ren'kawn aen' a saec' na' lah' ri heul' tawngnhaw' ka pang bhen' keute' na' ko', punta kaw peue kuit rot ri beun' aen' ka na', kan' yeuh ka ri uin' aen' kaw peue suip ri ris a heul' yeut."

Yu'das' kuit deut eun ri kaw fuin Yesu' Eun

¹⁰ Hawc' awn' na, Yu'das' I'sakariot' ku' meuh hk'a'nae tapae' kul'leual' peue na' punta kaw eun ap fuin Yesu' Eun ri ro' ce peue jhawp' rit na', eun heul' ri ce. ¹¹ Yam pun ce ri mhawng' leukah' eun na', ce ren'kawn nyawk'. Ce yeuh kati kaw tuil' eun is' leumuil. Kop awn' na, eun sok yam htuk' lai ri kaw ap fuin Eun ri ce na'.

Yesu' hk'a Eun pawe vel nya na' mae' tapae' ri na' ce

¹² Seunyi la ka pawe un' seue' hkawomun' is' paeng na', tam' ritroe ka na' ko' kah ri tan kon'jung' ka pawe vel nya na', tapae' na' ce ing' mhaing' Yesu' Eun, "Mi ci' sum' kah ye rangraen vang kaw e' hk'asom' pawe vel nya na' tawngnhaw'?"

¹³ Eun ku kah tapae' ri na' ka heul' lal' peue. Eun lah' a ri ka, "Ing' lec nang veng na' reu'. A'ta' gui keutong' leuum' ti peue na' kaw eun ing' hk'eup' pa'. Pa' na' hot' ri lec nya lec eun na' reu'. ¹⁴ Pa' na' lah' a ri cawo' ka nya lec eun na', 'Seura' mhaing' Eun hkawng ut' chec' vang kaw Eun hk'a

pawe vel nya tiduih' maeé tapae' Eun ná ce, a cí meuh tawngnhaw'?

¹⁵ Eun kaw va ri tuil' pa' nawk hkawng keuting htan hk'a'tuh hk'iu' ri rangraen ri uin' ri meulamlam ri ná, rangraen pawe vel nya ná ri ka reu'." ¹⁶ Tapae' lal' peue ná ka ku ing' lec nang veng ná, ka hk'eup' seun' a ku' Yesu' lah' Eun ná. Kop awn' na, ka rangraen pawe vel nya ná ri ka.

¹⁷ Yam fec' ka ná, Yesu' Eun ing' meu tapae' kul'leual' peue ná ce. ¹⁸ Yam buih mok' ce ri som' maeé hpuin' ná, Yesu' Eun lah', "Uí' lah' a ri pe' neumneum, hk'a'naee pé' ri ti ri peue kaw eun fuin Uí'. A meuh ku' buih som' maeé Uí' ná eun."

¹⁹ Ce kuit nyhap' nyawk'. Ce lah' a ri Heun ti peue hawc' ti peue, "Hkuin' a ná un' meuh uí' ri ah?"

²⁰ Eun top' a, "Heun ri meuh eun hk'a'naee tapae' kul'leual' peue ná eun, a meuh ku' ruim ri som' paen' maeé Uí' ná eun. ²¹ Kon' ai' peue ná Eun kaw kah ri hot' seun' ku' tem' ri uin' ri ná. Daecti peue fuin Kon' ai' peue ná eun kaw pun ri hkam' hk'a' jha' ná. Peue awn' eun lawn ná un' keut' ko', a ná jaen chak' pun heun."

Hk'a pawe Eun Yesu'

²² Yam mok' ce ri som' ná, Yesu' Eun ti hkawomun' ná Eun mun' keuting ri Peucawo' Eun. Hawc' ko', Eun ves ri tuil' a ri tapae' ri ná ce. Eun lah', "Ti ri hk'a a reu'. Aen' meuh a tu' Uí'."

²³ Hawc' ko', Eun ti kaw' ná, Eun mun' keuting ri Peucawo' Eun. Hawc' ko', Eun tuil' a ri ce. Ce nyui kaw' awn' na gawm'euc' ri.

²⁴ Eun lah' a ri ce, "Aen' meuh a nham' Uí', a meuh nham' kati sat'ca'. A lhaee' bah pun peue heun'heun' ná peue. ²⁵ Kaw Uí' lah' a ri pe' neumneum, a lawn un' nang rot ti seunyi pun Uí' ri nyui leuum' pli' bui hk'u' nang kuing' Eun

Peucawo' na' ko', Ui' hkuin' kaw laee nyui leuum' plí' bui na' bae."

²⁶ Yam hawc' ce lah' ri cai suk'seun' na', ce pucti heul' pang gong Sanlon na'.

Yesu' lah' Eun lawng Petru' kaw eun tecla ri

²⁷ Yesu' Eun lah' a ri tapae' ri na' ce, "Pe' ri gawm'euc' kaw pe' tecla Ui'. Kopti tem' a ri yeuhki', 'Kaw Ui' toh cawo' go' kon'jung' na' eun.

Kon'jung' na' ce kaw taic'jah hk'ai' puri heul'."*

²⁸ Daecti hawc' ka tang kuh' im' Ui' na', Ui' kaw bai heul' nang kuing' Galilae' na' nanggal' pe'."

²⁹ Petru' eun lah', "Peue saec' na' tecla Mi gawm'euc' ri, daecti ui' hkuin' kaw tecla Mi."

³⁰ Yesu' Eun top' a, "Kaw Ui' lah' a ri mi neumneum, bul seunyaen' nanggal' el' un' nang leuo' ka lal' pok na', kaw mi lah' ri un' yawng Ui' hton loe' pok."

³¹ Daecti Petru' eun lah' hkam' a ri Heun, "Ui' saec' na' yeum mae' Mi, ui' hkuin' kaw lah' ri un' yawng Mi." Saec' meuh tapae' seubu na' ce gawm'euc' ce ku lah' a yeuh keutit' yeut.

Yesu' hk'o' Eun mun' vang muis Gesemani'

³² Ce heul' rot ri vang muis Gesemani' na'. Yesu' Eun lah' a ri tapae' na' ce, "Yam heul' hk'o' Ui' mun' na', pe' ri pe' na' mok' maen' awh." ³³ Eun va Petru', Yakop' mae' Yo'han ce heul' mae' ti. Eun hpum' lu kuit nyhap' nyawk'. ³⁴ Eun lah' a ri ce, "Hpum' lu kuit nyhap' Ui' nyawk', a hk'o' Ui' kaw yeum. Ko' maen' na' meulamlam ri reu'."

³⁵ Hawc' ko', Eun sat ri heul' peunaeng'. Eun nghup' ri hk'o' mun' pang keute' na'. A lawn kaw cang ko', Eun hk'o' meuyam aen' na pon hk'ai' ti. ³⁶ Eun hk'o' mun' lah',

* 14:27 14:27 Yahkari' 13:7

“Aba[†], A'kuiing', cang yeuh Mi ku ceu na' gawm'euc' ka. Hk'o' Mi ti kaw' aen' na heul' hk'ai' Ui'. Daecti pawlaee kah a meuh alo Ui', kah a htonnuk hot' alo Mi na'.”

³⁷ Yam tang ing' rot Eun mae' tapae' na' ce na', Eun pun ri nyu buih it' nyum ce. Eun lah' a ri Petru' eun, “Si'mon, kaw'n' meung mi it' ri aw? Kaw mi ko' ti nali yawo ka un' pun aw? ³⁸ Punta kaw mi un' pun ri hk'ui' hk'a'nae hk'a' cop'long na', hk'o' mun' ko' reu'. Civit mi na' a saec' rangraen ri, daecti tu' mi na' a kaw'n' kaw'l'reng kloe.”

³⁹ Hawc' ko', Eun tang heul' hk'o' mun' seun' ku' hk'o' eun nangal' na' bae ti pok. ⁴⁰ Yam tang ing' rot Eun bae na', Eun pun ri nyu kaw'n' meung ce it' nyum ri kopti un' sum' plang' ce ngai' ri na'. Ce hkuin' laee yawng kaw ri lah' keunhaw' ri Heun.

⁴¹ Yam tang ing' rot Eun bae loe' pok na', Eun lah' a ri ce, “Kaw'n' meung pe' it' ri keului' ri aw? Peunaw' reu'. Rot a yam ka hawc'. Keue' reu', Kon' ai' peue na' kaw Eun pun fuin peue ri ap ri nang ti' ce peue map' na' hawc'. ⁴² Kuh', heul' pawh. Ku' fuin Ui' na' ing' rot eun hawc'.”

Mheut' Yesu' Eun

⁴³ Yam buih leukah' Eun na', Yu'das' ku' meuh tapae' hk'a'nae tapae' kul'leual' peue na' eun ing'. Peue jang' leungawng mae' peue jang' hku' ti cum na' ce ku hot' eun ing'. Peue cum aw'n' ce meuh peue ku' cus' ce ro' peue jhawp' rit keuting, peue guil leukah' ritroe mae' ro'kan nang kawt na' ce.

⁴⁴ Ku' fuin Eun na' eun yeuh het' ka ri ce lah', “Ui' lawn huit' a'nhaw' ko', meuh ka hkawn' Eun hawc'. Mheut' ri va Eun heul' ko' kaw'n' Eun meulamlam ri awh.” ⁴⁵ Yu'das' eun keulawn' ing' ri Yesu' Eun. Eun lah', “Seura'.” Hawc' ko', eun huit' Eun. ⁴⁶ Ce mheut' Yesu' Eun. ⁴⁷ Ku' cawng

[†] 14:36 14:36 Meuh a leukah' Arame', vangdoh' ka na' a meuh “a'kuiing'”.

keunam ce ti peue na', eun htut' leungawng na' eun bhat' yhuk' eun mhai' eun peue jhawp' rit keuting na' boc'.

⁴⁸ Yesu' Eun lah', "Meuh Ui' peue fuin kuing' aw, pe' vae' jang' leungawng jang' hku' ing' mheut' Ui'? ⁴⁹ Ut' Ui' mae' pe' nang kang' hkung' ka nya hk'o' mun' keuting na' keuyuit, pe' hkuin' mheut' ri ti Ui'. Daecti Htawm Seunga' na' kaw a kah ri htonnuk." ⁵⁰ Hawc' ko', tapae' Eun na' ce tecla Eun gawm'euc' ri. Ce hk'uih hk'ai' Heun.

⁵¹ Nang nhum' ti peue na' eun seubhaee' hpen' linin koe, eun hot' Yesu' Eun heul'. Na' ce kaw mheut' eun, ⁵² eun gloh'gleh' ri tec hpen' na', eun hk'uih heul' tu' seurak' ri.

Yesu' cawng Eun nanggal' ce muk peue hk'om kan' na'

⁵³ Ce va Yesu' Eun heul' ri peue jhawp' rit keuting na' eun. Ro' peue jhawp' rit na' ce, peue guil leukah' ritroe na' ce mae' ro' kan nang kawt na' ce ing' hk'om puri mawn' gawm'euc' ri. ⁵⁴ Petru' eun ut' vang ca ri seungai na', eun hot' Yesu' Eun heul' rot ti kang' hkung' ka nya eun peue jhawp' rit keuting na'. Eun ing' mok' ri cuil ngawl mae' peue ko' nya hk'o' mun' keuting na' ce.

⁵⁵ Ro' peue jhawp' rit mae' muk peue hk'om kan' na' ce co'ca' ri sok sa'hki' kuing' ri toh Yesu' Eun, daecti ce hkuin' nyu sa'hki' ka saec' ti ceu. ⁵⁶ Peue hkam' sa'hki' un' cawp' un' meuh na' heun' ce yeut, daecti sa'hki' hkam' ce na' a hkuin' maen puri.

⁵⁷ Ngon' ce kuh' cawng ri tang' hkam' sa'hki' un' cawp' un' meuh na' ri Heun, ⁵⁸ "Pun ye ri mhawng' lah' Eun a yeuh keutit', 'Kaw Ui' yeuh nya hk'o' mun' keuting ku' pleng' peue ri ti' ri aen' na lu. Hawc' ko', hk'a'naee ka loe' seunyi na', Ui' kaw tang pleng' nya hk'o' mun' keuting seubu bae ti lhang', a hkuin' kaw meuh ku' peue pleng' peue ri ti' ri.' " ⁵⁹ Ce saec' hkam' sa'hki' yeuh keutit' ko', daecti sa'hki' hkam' ce na' a ko' ri kah' puri.

⁶⁰ Hawc' ko', peue jhawp' rit keuting na' eun kuh' cawng nanggal' ce muk peue hk'om kan' na'. Eun mhaing' Yesu' Eun, "Kaw Mi un' top' a saec' ti moeng aw? A'mu tang' peue ri Mi na', Mi ci' kaw lah' a yeuh sa'nhaw'?" ⁶¹ Daecti Yesu' Eun dit'ti. Eun hkuin' top' leukah' eun na'.

Peue jhawp' rit keuting na' eun tang mhaing' Eun bae ti pok, "Meuh Mi Hkrit, Kon' ai' Eun Peucawo' Cawo' suk'seun' peue na' Eun aw?"

⁶² Yesu' Eun lah', "Euh, meuh Ui' yeut. Pe' kaw pun ri nyu Kon' ai' peue na' mok' Eun hk'a' ti' a'tawm' Eun Cawo' ti'ca keuting na', mae' pe' kaw pun ri nyu lih Eun hk'a'nae' putum' ka kuing' pang ma' na'."

⁶³ Kop awn' na, peue jhawp' rit keuting na' eun res hk'o ri na'. Eun lah', "E' ci' kaw'n' kaw lo' sa' hki' keunhaw' na' bae? ⁶⁴ Pun pe' ri mhawng' lah' Eun leukah' un' nawpsang ri Peucawo' Eun hawc', pe' ci' kaw kuit a yeuh sa'nhaw'?"

Ce ri gawm'euc', ce sahpaw' Eun kuing' ri yeum. ⁶⁵ Hawc' ko', ngon' ce htueng' Eun ri nyel' ri. Ce kang' ngai' Eun na', ce nu' Eun. Hawc' ko', ce lah' ri pleh jaing' Eun, "Cop, a'nhaw' ci' klae' Mi?" Peue ko' Eun na' ce va ri heul' klae' Eun.

Petru' quil eun ri un' yawng Yesu' Eun

⁶⁶ Yam Petru' ut' eun plak' hk'a'col ka kang' hkung' nya na', a kue' beun' mhai' eun peue jhawp' rit keuting ti peue na' ka ing' mawn'. ⁶⁷ Yam pun ka ri nyu Petru' mok' eun ri cuil ngawl na', ka seuluil' eun.

Ka lah', "Mi ku meuh peue ut' mae' Yesu' peue veng Nasaraet' na' Eun yeut."

⁶⁸ Daecti Petru' eun htu'hting' lah', "Hpaw ui' ca' yawng ku' lah' pa' na'." Hawc' ko', eun pucti heul' hk'ai' leuva' ing' ri na'. Hawc' ko', el' na' a leuo'.

⁶⁹ Yam beun' mhai' awn' tang nyu ka eun mawn' bae na', ka tang lah' a ri peue cawng keunam mawn' na' ce

baee, “Hkawn’ eun ku meuh cum ce ti peue yeut.” ⁷⁰ Daecti Petru’ eun tang htu’hting’ ka bae.

Hawc’ ka na’ bae ti hk'ao, peue cawng keunam mawn’ na’ ce lah’ a ri Petru’ eun, “Neum, meuh mi cum ce ti peue yeut, kopti meuh mi peue Galilae’ na’.”

⁷¹ Eun tang sae’caee’ hkam’ a ri ti meun, “Hpaw ui’ ca’ yawng ku’ lah’ pe’ na’ Eun.”

⁷² Yam awn’ na, el’ na’ a keulawn’ leuo’ rot lah’ pok. Petru’ eun kuit rot ri ku’ Yesu’ lah’ Eun na’, “Nanggal’ el’ un’ nang leuo’ ka rot lah’ pok na’, kaw mi guil ri un’ yawng Ui’ loe’ pok.” Petru’ eun yam maeé’ hpum’ sui’ ri.

15

Cawo’ Pi’lat mhaing’ eun Yesu’ Eun

¹ Yam ceng’ ka na’, ro’ peue jhawp’ rit, peue guil leukah’ ritroe, ro’kan nang kawt maeé’ muk peue hk'om kan’ na’ ce kuit a deut. Ce mawt Yesu’ Eun, hawc’ ko’ ce va ri heul’ ap Eun ri cawo’ Pi’lat eun.

² Cawo’ Pi’lat eun mhaing’ Eun, “Meuh Mi hkun’haw’hkam’ ce peue Yu’da na’ aw?”

Yesu’ Eun top’ a, “Euh, seun’ a ku’ lah’ mi na’ yeut.”

³ Ro’ peue jhawp’ rit keuting na’ ce tang’ a’mu ri Heun heun’ ceu. ⁴ Kop awn’ na cawo’ Pi’lat eun lah’ a ri Heun bae ti pok, “Kaw Mi un’ laee top’ keunhaw’ a aw? Keue’ reu’, tang’ ce map’ ri Mi heun’ ceu.”

⁵ Daecti Yesu’ Eun un’ nang top’ a saec’ ti moeng. Cawo’ Pi’lat eun am’ nyawk’.

Taws’ a’mu yeum ri Yesu’ Eun

⁶ Yam yeuh pawe vel nya na’ a kue’ ritroe cawo’ veng na’ ploé’ eun peue htawng’ ti peue seun’ ku’ peue kuing’ na’ hk'o’ ce na’. ⁷ A kue’ peue htawng’ muis Barabas’ ti

peue. Eun ut' hk'a'naee muk ce peue fuin kuing' na'. Eun toh peue yam fuin ce kuing' na'.

⁸ Peue cum heun' na' ce huk' hk'o' cawo' Pi'lat eun yeuh a seun' ku' tawn yeuh eun na' ri ce. ⁹ Cawo' Pi'lat eun mhaing' ce, "Sum' kah pe' ui' ploé' hkun'haw'hkam' ce peue Yu'da na' Eun ri pe' aw?" ¹⁰ Kopti cawo' Pi'lat yawng eun ro' peue jhawp' rit na' ap ce Yesu' Eun ri ti kopti hkoe'mang' ce Eun na'. ¹¹ Daecti ro' peue jhawp' rit na' ce cu' peue cum heun' na' ce hk'o' cawo' Pi'lat eun ploé' Barabas' eun tang' Yesu' Eun.

¹² Cawo' Pi'lat eun mhaing' ce, "A lawn yeuh keutit' ko', ku' lah' pe' meuh hkun'haw'hkam' ce peue Yu'da na' Eun, pe' ci' sum' kah ui' yeuh sa'nhaw' ri Heun?"

¹³ Ce klawng ri lah', "Tawk' Eun yeum pang kleum' rawng'tawp' na' reu'."

¹⁴ Cawo' Pi'lat eun mhaing' ce, "A ci' meuh kop ke-unhaw'? Eun ci' yeuh ku' kleuc' keunhaw'?" Daecti ce klawng ri lah' laws' a bae, "Tawk' Eun yeum pang kleum' rawng'tawp' na' reu'."

¹⁵ Punta cawo' Pi'lat kaw eun yeuh ku' htuk' hpum' ce peue cum heun' na', eun ploé' Barabas' eun ri ce. Hawc' ko', eun kah peue ta'faet' Yesu' Eun. Eun ap ce tawk' Eun pang kleum' rawng'tawp' na'.

Peue suik' na' lah' ce ri pleh keunyas Yesu' Eun

¹⁶ Peue suik' na' ce va Yesu' Eun heul' nang kang' hkung' ka haw' eun cawo' keuting na'. Ce klawng peue suik' nang tawp na' ce ing' cu ri gawm'euc'. ¹⁷ Ce ti ri tuil' Eun cuip' hk'o dal' yawtmong na'. Ce ku taing' nhul' kat' na' seun' cui'maw hk'il' na' ce chui'p' a ri cing' Eun na'. ¹⁸ Hawc' ko', ce klawng ri lah' a ri Heun, "Hkun'haw'hkam' ce peue Yu'da, kah Mi mun' keuting reu'." ¹⁹ Ce ti ri ta'faet' cing' Eun na' ri hkawn na' ti pok hawc' ti pok. Ce htuong' Eun ri nyel' ri, seukluin ri fae' Eun. ²⁰ Yam hawc' ce lah' ri pleh

keunyas Eun na', ce hpuic' ri tec hk'o dal' yawtmong na'. Ce tang tuil' Eun cuip' hk'eung ri na'. Hawc' ko', punta kaw ce heul' tawk' Eun pang kleum' rawng'tawp' na', ce va Eun pucti heul'.

Tawk' Yesu' Eun pang kleum' rawng'tawp'

²¹ A kue' peue veng Sai'rin' muis Si'mon ku' meuh kuiing' ka Alek'sandó' maeé Ru'fas' na' caw eun ri ing' neum yung' hk'a'nok veng na', peue suik' na' ce yat ri tec' eun klawm' kleum' rawng'tawp' Eun Yesu' na'. ²² Ce va Yesu' Eun heul' vang lah' peue meuh Kolakohta' na' (vangdoh' ka na' a meuh "Vang doh cing"). ²³ Ce ti ri tuil' leuum' plí' bui hkawo' ri maeé mu'ra na' ri Heun, daecti Eun hkuin' nyui a. ²⁴ Ce tawk' Eun pang kleum' rawng'tawp' na'. Hawc' ko', a'nhaw' kaw htuk' ri pun hk'eung Eun na', ce cop puri gvah a.

²⁵ Yam tawk' ce Eun pang kleum' rawng'tawp' na', meuh ka peunngup seudim' nali. ²⁶ Ce tem' tu' htawm tang' map' na' ri Heun. Ce tem' a lah', "Hkun'haw'ham' ce peue Yu'da." ²⁷ Ce ku tawk' peue con' la' peue na' ka pang kleum' rawng'tawp' maeé Heun, hk'a' a'tawm' Eun na' ti peue hk'a' a've' Eun na' ti peue yeut. ²⁸ * ²⁹ Peue heul' ing' na' ce vai'vuit' cing' ri, ce lah' leukah' un' nawpsang ri Heun. Ce lah', "Cawo' ku' kaw yeuh nya hk'o' mun' keuting na' lu, hawc' ko' tang pleng' a hk'a'nae' loe' seunyi na' Mi, ³⁰ lih hk'ai' kleum' rawng'tawp' na' teum'kawm htut tu' Mi na' meun reu'."

³¹ Peue jhawp' rit keuting na' maeé peue guil leukah' ritroe na' ce ku lah' ri pleh keunyas Yesu' Eun yeut. Ce lah', "Eun teum'kawm htut peue ri pun, daecti Eun

* **15:28** 15:28 Nang htawm Seunga' na' ngon', a kue' nambat aet' aen' na. 28 Seun' lah' a ri nang htawm Seunga' na' a htonnuk neum, "Peue sawn' Eun meuh peue ut' hk'a'nok ka ritroe kuing'." (I'saya' 53:12)

hkuin' cang teum'kawm htut meun ti ri pun. ³² Kah Hkrit hkun'haw'hkam' ce peue I'sarela' na' Eun keulawn' lih hk'ai' kleum' rawng'tawp' na' maet'maen' reu'. E' ku na' pun ri nyu pun ri yum' Eun." Saec' meuh ku' tawk' ri pang kleum' rawng'tawp' mae' Heun na' ka ku lah' leukah' un' nawpsang heun' ceu na' ri Heun yeut.

Yesu' yeum Eun

³³ Tang' neum peunnyi rot hk'a'pul loe' nali na', bhen' keute' na' a duim'lawng euc'.

³⁴ Yam rot a hk'a'pul loe' nali na', Yesu' Eun klawng ri lah' seng' laws', "E'lo'i', E'lo'i' lama sabak'htani'?" Vang-doh' ka na' a lah', "Peucawo' Ui', Peucawo' Ui', a ci' meuh kop keunhaw' Mi vae' tecla Ui'?"†

³⁵ Yam peue cawng keunam mawn' na' ce ngon' pun ce ri mhawng' leukah' awn' a na', ce lah', "Ceng a, klawng Eun E'li'ya eun."

³⁶ Peue ti peue eun hk'uih heul' ti nya tuetai cup a nang leuum' pli' bui na na' eun pak' a ri hkawn na' eun tuil' Yesu' Eun nyui a. Peue awn' eun lah', "Pawlaee cheun' Eun, E'li'ya eun ci' na' kaw lih ti Eun lih un' lih, e' na' puing ko' ri nawk a."

³⁷ Hawc' Yesu' klawng Eun ri lah' seng' laws' na', Eun hpum' deut.

³⁸ Hpen' kang' nang nya hk'o' mun' keuting na' a res meuh lal' glawk' neum hk'a'tuh rot hk'a'col. ³⁹ Yam po' suik' cawng nanggal' Eun Yesu' na' pun eun ri mhawng' seng' klawng Eun na', eun lah', "Peue aen' meuh Eun taeng Kon' ai' Eun Peucawo' neumneum."

⁴⁰ Beun' na' ce ngon' ce ut' vang ca ri seungai na', ce ko' ri nawk a. A meuh Mari' peue veng Magadala', Salome mae' Mari' ma ka Yakop' aet' mae' Yo'ses ce. ⁴¹ Beun'

† 15:34 15:34 Suk'seun' 22:1

awn' ce hot' Yesu' Eun, ce teum'kawm ku' lo' Eun nang kuing' Galilae' na'. Saec' meuh beun' seubu huk' maeé' Heun nang veng Yeru'salaem heun' peue na', ce ku ut' teh' yeut.

Puing' Yesu' Eun

⁴² Seunyi awn' a meuh seunyi rangraen pawe (a meuh seunyi nanggal' ka seunyi Sin' na'). Kop awn' na, yam kaw a hk'aws' fec' na', ⁴³ Yo'saep peue veng Ari'mahtia eun hpum' hat'han' heul' hk'o' ri ti tu' Eun Yesu' na' ri cawo' Pi'lat eun. Yo'saep eun meuh peue muis laws' ut' nang muk ce peue taws' kan' na'. Eun meuh peue keutui' hpum' ko' kuing' Eun Peucawo' na'. ⁴⁴ Cawo' Pi'lat nguit eun pun ri ri mhawng' Yesu' yeum Eun hawc' na'. Eun kah peue heul' klawng po' suik' na' eun ing'. Eun mhaing' eun, "Yeum neum Eun hawc' aw?" ⁴⁵ Yam pun eun ri mhawng' a ri po' suik' eun yeuh keutit' na', eun tuil' tu' Eun Yesu' na' ri Yo'saep eun. ⁴⁶ Kop awn' na, Yo'saep eun ti tu' Eun Yesu' na' lih. Eun bawl' tu' Eun na' ri hpen' linin leuvaee ri ri uin' na'. Eun seue' Eun nang leuang' jhec' ri meuh keutui' leumuic na'. Hawc' ko', eun cut' ri dho' keutui' na' ri meul' seumu. ⁴⁷ Mari' peue veng Magadala' maeé' Mari' ma eun Yo'ses ka ku nyu vang uin' ce tu' Eun na'.

16

Yesu' tang kuh' im' Eun

¹ Yam seunyi Sin' na' hawc' ka na', Mari' peue veng Magadala', Mari' ma eun Yakop' maeé' Salome na' ce heul' leuvaee lamawn hom' kaw ri lhuik' tu' Eun Yesu' na'. ² Peunngup cawo ka seunyi keuhti ka vung yam seunyi lih ka na', ce heul' ri keutui' leumuic na'. ³ Ce mhaing' puri, "A'nhaw' ci' na' teum'kawm e' cut' ri tec meul' seumu dho' ka keutui' leumuic na'?"

⁴ Daecti yam seucon' ce a na', ce nyu meul' seumu keuting nyawk' awn' cut' a ri tec ri hawc'. ⁵ Yam ing' lec ce hk'a'naee ka keutui' leumuic na', ce nyu nang nhum' cuip' hk'o dal' paing ti peue tit' mok' eun hk'a' a'tawm' na'. Ce tok'seupa ruing nyawk'.

⁶ Eun lah', "Pawlaee tok'seupa ruing. Heul' sok pe' Yesu' peue veng Nasaraet' tawk' peue yeum pang kleum' rawng'tawp' na' Eun. Kuh' im' Eun hawc', hpaw Eun ca' laee ut' maen'. Ing' nawk vang uin' peue Eun na' reu'. ⁷ Pe' na' ing' lah' a ri tapae' Eun na' ce mae' Petru' eun yeuh keutit', 'Buih heul' Eun nang kuing' Galilae' nanggal' pe'. Pe' kaw nyu Eun teh' seun' lah' Eun a ri pe' hawc' na'."

⁸ Beun' awn' ce tok'seupa ruing lhat' keuyuing' pucti lih hk'ai' keutui' leumuic na' vaeavaee. Kopti lhat' nyawk' ce na', ce un' lah' keunhaw' ri a'nhaw'.

Yesu' tuil' Eun Mari' peue veng Magadala' ka nyu ri

⁹ Peunngup cawo ka seunyi keuhti ka vung yam Yesu' kuh' im' Eun na', Eun tuil' Mari' peue veng Magadala' na' ka nyu ri nanggal'. Beun' awn' ka meuh ku' Yesu' tawn ra Eun ri tec seuca' a' res tu' lih hk'ai' ka na'. ¹⁰ Mari' ka heul' ris peue tawn ut' mae' Yesu' Eun na' ce mhawng' a. Ce buih hpum' sui' hpum' tuk yam. ¹¹ Yam mhawng' ce lawng Yesu' im' Eun na' mae' lawng Mari' pun ka ri nyu Eun na', ce hkuin' yum' a.

Yesu' tuil' Eun tapae' lal' peue ka nyu ri

¹² Hawc' awn' na, Yesu' Eun tuil' tapae' lal' peue ri na' ka nyu ruprang seubu ri na' yam buih long ka hk'a' heul' hk'a'nok ka veng na'. ¹³ Ka tang ing' ris peue seubu na' ce mhawng' a, daecti ce ku un' yum' a yeut.

Yesu' tuil' Eun tapae' ri na' ce nyu ri

¹⁴ Hawc' awn' na, Yesu' Eun tuil' tapae' kul'ti peue ri na' ce nyu tu' ri na' yam buih som' ce na'. Eun is' ce kopti un'

kué ce hk'a' yum', maeé kopti lheu' ce leukah' ce un' yum' ku' lah' ce peue pun ri nyu Eun hawc' tang kuh' im' Eun na'.

¹⁵ Eun lah' a ri ce, "Heul' pang bhen' keute' na' ku duih' ka, lah' peue gawm'euc' peue mhawng' leukah' mun' ren'kawn na' reu'. ¹⁶ A'nhaw' lawn yum', rap ri ti hk'a' cum' na' ko', eun kaw pun hk'a' htut lawtpon na'. Daecti pun ce peue un' yum' na', ce kaw pun ri hkam' hk'a' taws' ámu na'. ¹⁷ Pun ce peue yum' na' a kaw kue' het' keuting yeuhki', ce na' cu muis Ui' na' ce na' ra ri tec seuca', ce na' lah' leukah' hk'u' heun' ceu, ¹⁸ ce na' mheut' seueueng' ri ti' ri, ce saec' na' hk'a' yun', ce hkuin' kaw yeuh keunhaw' ri ka, ce na' tang' ti' ri hk'a' pang peue peuyhat, peuyhat ce peue awn' a ku na' cuin."

Yesu' huk' Eun kuing' pang mao'

¹⁹ Yam Cawo' Yesu' hawc' lah' Eun a ri ce na', Peucawo' Eun yuk Eun huk' nang kuing' pang mao'. Eun mok' hk'a' a'tawm' Eun Peucawo' na'. ²⁰ Hawc' ko', tapae' na' ce pucti heul' sangsawn' leukah' mun' ren'kawn na' ku duih' hk'awp'. Cawo' Peucawo' Eun yeuh kan' maeé ce. Eun htawhkam leukah' ri na' ri yeuh Eun het' keuting pucti lih na'.*

* **16:20** 16:20 Nang htawm Seungá na' ngon', a hkuin' kue' nambat aet' 16:9-20 aen' ce.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 10 Sep 2021 from source files dated 10 Sep 2021

0468b0b5-acb2-59c4-92d3-4fa09a4d091c